

KSSB cemerlang di Asia Tenggara



Wakil Agensi Kerajaan Negeri Selangor bersama-sama anggota pengurusan dan kakitangan KSSB meraikan kejayaan meraih anugerah syarikat Amalan Terbaik Dalam Perlombongan Mineral Bukan Logam sempena 3rd ASEAN Mineral Awards 2023 di Phnom Penh, Kemboja pada 23 November 2023.

Kumpulan Semesta Sdn Bhd (KSSB) dinobatkan sebagai tiga syarikat terbaik menerusi pengiktirafan "Amalan Terbaik Dalam Perlombongan Mineral Bukan Logam" di 3rd ASEAN Mineral Awards 2023 yang diadakan di Phnom Penh, Kemboja.

Sebagai pemain industri di sektor perlombongan, anak syarikat Kerajaan Negeri Selangor itu berjaya disenaraikan pendek bagi mewakili Malaysia untuk bersing bersama 16 syarikat perlombongan di rantau Asia Tenggara (ASEAN).

Kejayaan itu merupakan hasil libat sama daripada Pejabat Tanah dan Galian Selangor (PTGS), Pejabat Daerah dan Tanah (PDT), Jabatan Mineral dan Geosains (JMG), Jabatan Alam Sekitar (JAS), Lembaga Urus Air Selangor (LUAS), Jabatan Pengairan dan Saliran Negeri

Selangor (JPS) serta agensi-agensi kerajaan negeri yang lain.

Ita juga membuktikan keupayaan KSSB dalam proses pengendalian tapak operasi perlombongan bahan batuan dan mineral secara menyeluruh serta memepati piawaian dan prosedur yang telah ditetapkan oleh pihak berkuasa negeri, pentadbiran pusat dan persekutuan maupun di peringkat antarabangsa.

ASEAN Mineral Awards ini merupakan pengiktirafan yang diberikan kepada penggiat industri perlombongan dan pengkuarian di ASEAN. Ita juga merupakan inisiatif yang dilaksanakan di bawah ASEAN Minerals Cooperation Action Plan "AMCAP" yang telah dipersetujui di bawah rangka kerja ASEAN Senior Officials Meeting in Minerals "ASOMM" dan ASEAN Ministerial Meeting in Minerals "AMMin".

rial Meeting in Minerals "AMMin".

Anugerah berkenaan diterima oleh Pengarah Urusan/Ketua Pegawai Eksekutif KSSB, Abdul Rahman Ishak semasa majlis makan malam gala ASEAN Ministerial Meeting on Minerals ('AMMin') di Sokha Phnom Penh Hotel pada 23 November lalu.

Abdul Rahman menzahirkan penghargaan kepada Kerajaan Negeri Selangor di bawah pimpinan Y.A.B Dato' Menteri Besar Selangor, Dato' Seri Amirudin Shari yang sentiasa memberikan sokongan dan kepercayaan kepada KSSB.

"Kejayaan ini merupakan hasil sokongan kerjasama daripada semua agensi dan jabatan kerajaan terlibat serta kaki tangga yang sentiasa menjadi tulang belakang syarikat," katanya.

Terdahulu, KSSB meraih kecemerla-

ngan melalui pengiktirafan yang diperoleh di 2nd ASEAN Mineral Awards 2019 yang berlangsung di Bangkok, Thailand.

Kecemerlangan operasi yang ditunjukkan oleh KSSB sebagai sebuah syarikat yang mengendalikan sektor perlombongan berjaya menempatkan KSSB sebagai pemenang bagi kategori "Amalan Terbaik Dalam Pembangunan Mineral yang Mampu (Pengedaran Mineral Bukan Logam)".

KSSB yang mula beroperasi pada tahun 2008 merupakan sebuah syarikat milikan Kerajaan Negeri Selangor yang dipertanggungjawab dalam menguruskan pengestrakan, pengeluaran, pengedaran dan penjualan pasir, bahan batuan dan sumber mineral sekali gus mempromosikan operasi perlombongan mineral yang mampu di negeri Selangor.



WBS

BANGKIT! MELAWAN KEGANASAN TERHADAP WANITA DAN KANAK-KANAK.

SEMPENA KEMEN 16 HARI AKTIVISME MELAWAN KEGANASAN BERASASKAN GENDER



Bukti kemampuan tadbir urus negeri

SHAH ALAM - Kejayaan menjana kutipan hasil RM2.571 bilion setakat awal bulan ini membuktikan kecemerlangan tadbir urus Kerajaan Negeri dalam memajukan lagi Selangor.

Dato' Menteri Besar Dato' Seri Amirudin Shari menjelaskan pencapaian 128 peratus melebihi sasaran 2023 iaitu RM2 bilion juga akan dikembalikan semula untuk manfaat rakyat.

"Kita akan terus membanting tulang dan mempelbagaikan usaha agar aras kejayaan ini dapat dikenalkan untuk dinikmati semua," katanya di Facebook pada 13 Disember.

Pada 11 Disember, Amirudin berikrar pentadbiran negeri akan memperkuuh azam untuk mentadbir dengan lebih baik demi memperhebat Selangor dan melindungi kebajikan rakyat.

Beliau berkata pembangunan ekonomi negeri juga bertambah baik apabila sumbangan Keluaran Dalam Negara Kasar meningkat kepada 25.5 peratus, lebih seperempat ekonomi Malaysia.

Persiapan rapi urus bencana

SHAH ALAM - Agensi Pengurusan Bencana Negara (Nadma) mengarahkan Jawatankuasa Pengurusan Bencana Peringkat Negeri/Daerah (JPBN/JPBD) diaktifkan berikutnya amaran hujan berterusan tahap waspada di beberapa kawasan yang dikeluarkan oleh Jabatan Meteorologi.

Nadma dalam Notis Kesiapsiagaan Operasi Bencana meminta JPBN dan JPBD meningkatkan tahap kesiapsiagaan termasuk pusat pemindahan, keperluan asas dan pos kawalan bagi menghadapi bencana terutama di kawasan berisiko tinggi.

"Pusat kawalan bencana juga sentiasa dalam kesiapsiagaan menerima maklumat bencana, bantuan pengurusan dan pengoperasian dari semasa ke semasa melalui nombor telefon 03-8064 2400, faksimili 03-8064 2429 dan alamat e-mel opsroom@nadma.gov.my," menurut kenyataan itu pada 20 Disember.

IMBAS DI SINI
akhbar digital minggu lepas

Raja Muda penaung Diraja Invest

SHAH ALAM - Duli Yang Teramat Mulia (DYTM) Raja Muda Selangor Tengku Amir Shah berkenan menjadi Penaung Diraja pertama untuk Invest Selangor Berhad (Invest Selangor).

Menurut kenyataan agensi penggalak pelaburan negeri itu, pelantikan Baginda pada 14 Disember seiring hasrat Invest Selangor untuk meningkatkan lagi profil negeri ke peringkat dunia.

"Keterlibatan DYTM Raja Muda Selangor dalam usaha promosi pelaburan seja-

jar visi meningkatkan ekonomi Selangor secara berkekalan dari segi sumber dan pembangunan sosial," kata kenyataan.

Dato' Menteri Besar Dato' Seri Amirudin Shari turut menyifatkan pelantikan itu sebagai pengiktirafan sekali gus mendorong Invest Selangor untuk menarik lebih banyak pelaburan.

"(Usaha ini juga) dapat menawarkan peluang pekerjaan bergaji tinggi kepada warga Selangor," katanya.

Ketua pegawai eksekutif Invest Selan-

gor percaya kepimpinan Tengku Amir Shah memenuhi aspirasi syarikat untuk mempromosi Selangor sebagai destinasi pelaburan terbaik di Asia Tenggara.

"Ini pengiktirafan tinggi untuk kami terus berinovasi dan menyumbang kepada pembangunan ekonomi," kata Dato' Hasan Azhari Idris.

Sejak penubuhannya, syarikat itu menarik 6,496 projek pembuatan RM218.36 bilion sekali gus mewujudkan 476,886 peluang pekerjaan.

Pacu ekonomi negeri

Rangkum empat kota atasi birokiasi

Oleh **SITI ROHAIZAH ZAINAL**

KLANG - Usaha merangkum pentadbiran Lembah Klang Raya meliputi empat bandar raya iaitu Petaling Jaya, Subang Jaya, Shah Alam dan Klang bakal memacu pertumbuhan ekonomi negeri.

Dato' Menteri Besar menjelaskan penyatuan tersebut menyeragam urus tadbir seterusnya memudah cara proses perniagaan dan pembangunan, mengurangkan karenah birokiasi dan memudahkan rakyat.

Dato' Seri Amirudin Shari berkata gagasan itu menarik pelaburan berteras pendigitalan dan menjadi bandar berdaya tahan dalam berdepan cabaran perubahan iklim, bandar mampu serta

berdaya huni.

"Pentadbiran Lembah Klang Raya akan memacu pertumbuhan ekonomi negeri dan meletakkan Selangor sebagai negeri ulung di Asia Tenggara sebaris dengan wilayah terkemuka," katanya.

Beliau mempersebah Ucapan Taat Setia sempena Ulang Tahun Hari Keputeraan Sultan Selangor ke-78 di Balairung Seri, Istana Alam Shah di sini pada 11 Disember.

Amirudin juga menambah projek Wilayah Pembangunan Bersepadu Selangor Selatan (IDRISS) seluas 40,000 ekar bakal mewujudkan perbandaran baharu seumpama Shah Alam atau Bangi.

Selain itu, beliau menjelaskan Majlis Kemahiran dan Pekerjaan Selangor

ditubuh bagi membantu menyediakan 100,000 peluang pekerjaan yang menawarkan gaji tinggi khususnya generasi muda.

Katanya, pembangunan ekonomi negeri kian bertambah kukuh berikutan sumbangan kepada Keluaran Dalam Negara Kasar (KDNK) naik kepada 25.5 peratus, lebih seperempat ekonomi Malaysia.

Menurut beliau lagi, Selangor juga mencatat kutipan hasil RM2.571 bilion iaitu 128 peratus daripada sasaran iaitu RM2 bilion setakat 6 Disember.

"Ini membuktikan kesungguhan barisan penjawat awam dan seluruh pentadbiran negeri dalam memacu ekonomi dan meningkatkan hasil demi manfaat rakyat," katanya.

Rasmi pusat sokongan barah, buku

PETALING JAYA - Duli Yang Maha Mulia (DYMM) Tengku Permaisuri Selangor berkenan merasmikan pusat sokongan pesakit barah, Rumah KanWork di Damansara Utama, di sini pada 13 Disember.

Tengku Permaisuri Hajah Norashikin turut berkenan melancar buku Dari Dapur KanWork terbitan pusat tersebut, berkisar kepada aspek pemakanan sepanjang proses penyembuhan pesakit.

SUBANG JAYA - Selangor mahu menarik lebih ramai pelabur berkualiti tinggi dalam pelbagai sektor mulai tahun depan bagi mewujudkan peluang kerja bergaji tinggi kepada anak muda.

EXCO Pelaburan Ng Sze Han percaya negeri meletakkan hala tuju demikian dalam aspek pelaburan supaya usaha memulihkan ekonomi negeri berjalan lancar dan lebih cepat.

Baginda diiringi Yang Dipertua Pertubuhan Kebajikan dan Amal Wanita Selangor (Pekawanis) Datuk Seri Masdiana Mohamad turut menyempurnakan penyerahan sumbangan beberapa pihak kepada KanWork.

Badan itu ialah Perbadanan Wakaf Selangor, Yayasan Waqaf Malaysia serta Unit Penyelaras Pelaksanaan Jabatan Perdana Menteri, masing-masing menyumbang RM50,000.

Sasar pelabur tawar gaji tinggi

"Dengan cara ini, kita yakin peluang mewujudkan pekerjaan bergaji tinggi pasti lebih cerah," katanya.

Beliau menambah pengajuran program bertaraf antarabangsa seperti Sidang Kemuncak Perniagaan Antarabangsa Selangor (SIBS) dan Pameran Udara Selangor (SAS) juga akan diteruskan.

"Dengan adanya ekspo ini, kita dapat mempromosi nama Selangor sebagai

Pengerusi KanWork Dr Mazanah Muhamad berkata pusat berkenaan akan dimanfaat sebaik mungkin bagi menyokong semua pesakit serta dibuka luas untuk orang ramai.

"Selepas 18 tahun ditubuhkan, KanWork memiliki premis sendiri yang diwakafkan individu. Rumah ini dilengkapi pelbagai kemudahan antaranya taman, tempat beriadah selain khidmat kaunseling," katanya.

destinasi pelaburan terbaik di rantau Asean," katanya.

Pada tahun depan, SIBS dijadual berlangsung dua kali iaitu antara 25 hingga 27 Julai dan 16 hingga 19 Oktober di Pusat Konvensyen Kuala Lumpur.

China, Indonesia, Japan, Vietnam, Kazakhstan, Korea, Turkiye dan Australia antara negara luar yang mengambil bahagian dalam pengajuran edisi ketujuh.



Sultan Sharafuddin (dua, kiri) berkenan menganugerahkan Darjah Kerabat Selangor kepada Tunku Azizah sempena Ulang Tahun Hari Keputeraan ke-78 Baginda di Istana Alam Shah, Klang pada 14 Disember. Foto HAFIZ OTHMAN

Tubuh majlis pekerjaan Selangor

Sedia latihan ikut kehendak pasaran

Oleh ZAREEF MUZAMMIL

SHAH ALAM - Majlis Kemahiran dan Pekerjaan Selangor akan ditubuh pada tahun depan bagi mencipta bidang latihan baharu bersesuaian kehendak pasaran, kata Dato' Menteri Besar.

Dato' Seri Amirudin Shari berkata jawatankuasa khas itu mengumpulkan majikan dan institusi bagi membuat unjuran pekerjaan berdasarkan sektor pelaburan yang dalam proses kelulusan.

Katanya, majlis itu berfungsi meningkatkan produktiviti pekerja sekali gus memberi peluang kepada penduduk memanfaatkan peluang pekerjaan sedia ada termasuk yang

bakal diwujudkan.

"Contohnya, (bidang) pengaturcaraan sangat popular dan diperlukan (pasaran) tetapi ada sebahagian latihan untuk pengaturcaraan di kampus tidak 'update' dan teknologi baharu.

"Apabila tamat belajar, pelajar ambil pula latihan profesional untuk jadi pengaturcara yang baik. Ini antara perkara asas yang kena buat segera tahun depan," katanya pada 12 Disember.

Amirudin juga melihat keperluan untuk mewujudkan dasar bagi menggalakkan pelajar mengambil Program Pendidikan dan Latihan Teknikal dan Vokasional (TVET) sebagai kurikulum tambahan.

"Kita kena buat cadangan dasar bagaimana keterlibatan anak-anak

di sekolah supaya bidang TVET diajarkan kurikulum tambahan sama ada peringkat kementerian atau jabatan pendidikan.

"Melalui platform itu, ia (TVET) masih boleh dikembang dan diperkasa sejajar penubuhan jawatankuasa yang akan kita wujudkan," katanya lagi.

Sebelum ini, Kerajaan Negeri mahu memperkuuh kerjasama dengan syarikat industri teknologi tinggi tahun depan bagi melatih pelajar dalam bidang berkaitan sekali gus melahirkan ramai tenaga kerja bergaji tinggi.

Amirudin berkata usaha itu dijalankan melalui Pusat Pembangunan Kemahiran Teknikal Selangor (STDC) untuk menawarkan pensijilan profesional kepada anak muda.

UKM, UiTM ungguli debat diraja

SHAH ALAM - Duli Yang Maha Mulia Tengku Permaisuri Selangor Tengku Permaisuri Hajah Norashikin berkenan menyaksikan Pertandingan Akhir Debat Diraja antara institut pengajian tinggi (IPT).

Dalam pertandingan edisi ke-24 itu, Universiti Kebangsaan Malaysia mengungguli kategori bahasa Melayu dan membawa pulang hadiah wang tunai RM5,000, piala pusingan beserta trofi.

UiTM pula dipilih sebagai pemenang kategori bahasa Inggeris manakala Universiti Malaya menjuarai kategori bahasa Arab. Kedua-dua pasukan turut membawa pulang hadiah sama.

Merasmikan acara tersebut di Universiti Teknologi Mara (UiTM) di sini pada 18 Disember, Baginda yang juga Canselor UiTM berkenan menyempurnakan penyampaian hadiah kepada

pemenang.

Hadir sama, Dato' Menteri Besar Dato' Seri Amirudin Shari, Menteri Pendidikan Tinggi Datuk Seri Zambry Abdul Kadir dan Naib Canselor UiTM Prof Datuk Dr Shahrin Sahib @ Sahibudin.

Sebanyak 85 pasukan bertanding dalam tiga kategori bahasa membabitkan penyertaan 19 universiti awam dan empat pusat pengajian tinggi swasta.

Raja Permaisuri terima Darjah Kerabat

KLANG - Raja Permaisuri Agong Tunku Azizah Aminah Maimunah Iskandariah berkenan menerima Darjah Kerabat Selangor Yang Amat Dihormati (D.K) di Balairung Seri, Istana Alam Shah pada 14 Disember.

Darjah kebesaran tertinggi negeri itu dikurnia sempena Ulang Tahun Hari Keputeraan ke-78 Duli Yang Maha Mulia (DYMM) Sultan Selangor Sultan Sharafuddin Idris Shah Alhaj.

Yang di-Pertuan Agong Al-Sultan Abdullah Ri'ayatuddin Al Mustafa Billah Shah dan DYMM Tengku Permaisuri Selangor Tengku Permaisuri Hajah Norashikin turut berangkat ke istiadat itu.

Turut berangkat, Pemangku Raja Pahang Tengku Hassanal Ibrahim Alam Shah dan Duli Yang Teramat Mulia (DYTM) Raja Muda Selangor Tengku Amir Shah.

Darjah kebesaran itu, yang dizahirkan pada 1961, dikurnia kepada kerabat diraja di Malaysia dan raja-raja negara lain sebagai penghormatan dan persahabatan akrab dengan Sultan Selangor.

Tunggu kerja kukuh tanah siap

SUBANG JAYA - Laporan awal siasatan status keselamatan penghuni sembilan rumah teres di Taman Wawasan Puchong di sini yang terkesan susulan tanah runtuhan akan diperoleh sebaik selesai kerja pemasangan cerucuk besi.

Ketua Polis Daerah Serdang Asisten Komisioner AA Anbalagan berkata pemasangan cerucuk besi yang giat dilaksana ketika ini dijangka selesai dalam tempoh dua minggu bergantung keadaan cuaca.

"(Siasatan keselamatan) masih lagi dalam peringkat kajian oleh Jabatan Mineral dan Geosains termasuk Majlis Bandaraya Subang Jaya serta Jabatan Kerja Raya bahagian cerun."

"(Penilaian) sama ada penduduk yang diarah berpindah sebelum ini selamat atau tidak untuk kembali ke rumah masing-masing. Jika kita rasakan kawasan ini tidak selamat, jabatan berkaitan akan maklumkan kepada penduduk," katanya pada 19 Disember.

Cungkil bakat belia, perbanyak wacana

SHAH ALAM - Kementerian Pengajian Tinggi komited untuk meneruskan tradisi Pertandingan Debat Diraja dalam usaha mencungkil bakat terbaik belia di seluruh negara.

Menterinya Datuk Seri Dr Zambry Abdul Kadir berkata penganjurannya ke arah merealisasi wawasan Malaysia Madani iaitu usaha ke arah pembudayaan ilmu dan kepelbagaian wacana.

"Pertandingan ini sinonim sebagai wadah untuk mengasah daya fikir dan kepelehan pelajar, selain amat signifikan dalam melahirkan pelajar cemerlang dari segi akademik, sahsiah dan keterampilan. Ia juga dapat menyegarkan tradisi intelektual di kampus," katanya pada 18 Disember.



Jangan leka ancaman Covid-19

SHAH ALAM - Penduduk Selangor dinasihat mengamal langkah pencegahan dan kawalan kendiri bagi mengurangkan risiko jangkitan Covid-19 susulan peningkatan kes ketika ini.

Ahli Penasihat Kesihatan Awam Negeri Dr Mohammad Farhan Rusli berkata kawalan seperti pemakaian pelitup muka di tempat awam terutama kawasan tertutup, sempit dan sesak sangat wajar.

"Kawalan kendiri ini sepatutnya sebatи dan menjadi amalan rakyat kerana sudah tiga tahun kita terdidik dengan amalan pencegahan penularan Covid-19."

"Selangor negeri yang berkepadatan tinggi. Jadi penjarakan sosial kita (biasanya) terhad terutama di tempat awam yang tertutup seperti pusat beli-belah."

"Selain itu, musim cuti sekolah banyak majlis keramaian, perkahwinan, kenduri berkhatan atau bercuti di taman tema air yang melibatkan ramai orang. Jadi kena jaga diri sendiri dan buat kawalan kendiri untuk elak menjadi statistik Covid-19," katanya pada 19 Disember.

Ambil alih tanah ingkar arahan

KLANG - Isu membabitkan 12 lot tanah persendirian yang dijadikan tapak pelupusan sampah haram di Batu 14, Kapar di sini diserahkan kepada Kerajaan Negeri untuk tindakan lanjut.

Setiausaha Majlis Perbandaran Klang berkata pentadbiran negeri berhak mengambil alih atau membawa isu berkenaan ke mahkamah berikutan pemilik gagal memulihkan tanah dalam tempoh ditetapkan.

"Semakan mendapat sebanyak 12 lot terlibat, namun pihak Majlis hanya menjumpai empat pemilik sahaja dan mengeluarkan notis untuk memulihkan tanah tersebut dalam tempoh sebulan.

"Bagaimanapun, tempoh berkenaan sudah tamat dan (dalam hal ini) pihak Majlis tidak bersihkan (tanah) kerana ia tanah persendirian, sebaliknya pemilik yang kena berbuat demikian."

"Pemilik gagal bersihkan dan Kerajaan Negeri perlu buat keputusan sama ada mengambil tindakan mahkamah atau ambil alih tanah tersebut. (Perkara itu) dalam perbincangan," kata Zaireezal Ahmad Zainuddin.

Belia laksana dasar, program negeri

SHAH ALAM - Kerajaan Negeri bakal melantik 228 Penggerak Belia Selangor (PeBS) baharu bagi menjayakan dasar dan program untuk belia tahun hadapan.

EXCO Belia Najwan Halimi berkata mereka berperanan sebagai penghubung bagi membentuk perpaduan dalam kalangan masyarakat sekali gus mencorak masa depan Selangor yang lebih gemilang.

"Ini membuktikan kepercayaan pentadbiran negeri kepada belia untuk

bersama-sama menentukan hala tuju negeri ini. Tahun depan kita juga selaraskan program PeBS dengan dasar belia Selangor dan konsep Rakan Muda.

"Kita juga memperbanyak program-program literasi politik seperti pemahaman demokrasi dan kenegaraan dalam memupuk semangat nasionalisme dan patriotisme."

"Selain itu, kita mahu belia di negeri



ini terlibat dengan program kesiaran yang menjurus kepada semangat perpaduan dan muhibah," katanya pada 16 Disember.

PeBS dijenamakan semula pada 2021 daripada Penggerak Belia Tempatan (PeBT) yang diperkenal sejak 2009.

Pimpinan belia setempat itu memainkan peranan kepada agenda pembangunan generasi muda di setiap Dewan Undangan Negeri.

Kisah Umar, Salahuddin turut popular

Buku riwayat nabi, tokoh Islam laris

Oleh **ZAREEF MUZAMMIL**

SHAH ALAM - Naskhah terjemahan riwayat Rasulullah SAW dan tokoh Islam lain mendapat sambutan di reruai Inisiatif Buku Darul Ehsan (IBDE) dalam Pesta Buku Antarabangsa Selangor (SIBF).

Buku Muhammad: Riwayat Hidup Berdasarkan Sumber Terawal tulisan asal Martin Lings atau nama Islamnya Abu Bakar Sirajuddin paling laris dalam

program antara 1 hingga 10 Disember.

Karya yang dianggap biografi Rasulullah terbaik dunia diterbitkan IBDE dengan kerjasama Perbadanan Perpustakaan Awam Selangor (PPAS).

Naskhah berjudul Gelagat dan Ragam Orang Melayu tulisan Residen Jeneral Inggeris Frank Swettenham yang diterjemah dengan kerjasama Media Selangor pula kedua terlaris.

Ketiga popular, naskhah Umar Al-Khattab: Kebijaksanaan Sebagai

Pedang karangan cendekiawan Mesir Abbas Mahmud al-Aqqad.

Buku Salahuddin Al-Ayubi: Raja Penakluk juga tersenarai antara lima buku terlaris diikuti buku terbaru berjudul Perempuan Seribu Satu Malam yang turut meraih tumpuan ramai.

IBDE yang menerima geran Kerajaan Selangor giat menerbitkan buku terjemahan pelbagai genre meliputi sejarah, falsafah dan agama, sesetengah naskhah asal berusia ribuan tahun.

Bomba selamatkan bayi 14 bulan

SHAH ALAM - Pegawai Bomba Tinggi II mengimbau kenangan bersama rakan sepasukan menyelamatkan mangsa runtuhan Tragedi Highland Towers termasuk bayi perempuan berusia 14 bulan.

Hazal Kassim yang baru tujuh tahun berkhidmat pada masa itu juga bersyukur terselamat dari dihempap tembok besar ketika menyertai operasi menyelamat pada hari pertama kejadian itu.

Tergamam menyaksikan runtuhan dahsyat sebaik tiba di lokasi pada 11 Disember 1993, beliau mengakui sukar mencari mangsa yang masih hidup berikut tahap kerosakan terlalu teruk.

Namun, beliau berkata mereka bersemangat apabila berjaya menyelamatkan dua wanita, seorang Jepun dan seorang Indonesia bersama bayi dari celah runtuhan pada hari pertama tragedi.

"Kami terkejut kerana ada bayi yang masih hidup dalam tragedi sebesar itu. Penemuannya menyuntik semangat seluruh pasukan untuk meneruskan usaha pencarian meski sukar," katanya.

Beliau ditemui bual sempena ulang tahun ke-30 tragedi yang mengorbankan 48 orang berikutnya satu blok bangunan kondominium itu di Taman Hillview, Ulu Klang menyembah bumi.

Hazal yang kini berusia 58 tahun juga masih ingat detik yang hampir meragut nyawanya apabila tempok besar yang terletak di belakangnya runtuh tiba-tiba ketika usaha menyelamat dibuat.

Katanya, beliau diarah turun bersendirian ke celahan runtuhan bagi sebelum menemui takungan air bersaiz separuh gelanggang futsal di tempat letak kereta kondominium itu.

"Saya masuk ke celahan runtuhan tanpa sebarang peralatan. Selepas jumpa takungan air besar, saya berdepan detik cemas apabila ada satu tembok besar jatuh di belakang saya."

"Jika ia jatuh atas saya, tiada siapa tahu nasib saya. Saya benar-benar bersyukur kerana masih dipanjangkan usia."

	Hulu Selangor, Gombak, Petaling,			Hulu Langat dan Sepang			
	Imsak	Subuh	Syuru'	Zuhur	Asar	Maghrib	Isyak
21 Khamis	5:51	6:01	7:11	1:14	4:36	7:11	8:26
22 Jumaat	5:51	6:01	7:12	1:14	4:37	7:11	8:26
23 Sabtu	5:52	6:02	7:12	1:15	4:37	7:12	8:27
24 Ahad	5:52	6:02	7:13	1:15	4:38	7:12	8:27
25 Isnin	5:53	6:03	7:13	1:16	4:38	7:13	8:28
26 Selasa	5:53	6:03	7:14	1:16	4:39	7:13	8:28
27 Rabu	5:54	6:04	7:14	1:17	4:39	7:14	8:29



	Klang dan Kuala Langat				
	Imsak	Subuh	Syuru'	Zuhur	Asar
	5:51	6:01	7:12	1:14	4:37
	5:51	6:01	7:12	1:15	4:38
	5:52	6:02	7:13	1:15	4:38
	5:52	6:02	7:13	1:16	4:39
	5:53	6:03	7:14	1:16	4:39
	5:53	6:03	7:14	1:17	4:40
	5:54	6:04	7:15	1:17	4:40

	Sabak Bernam dan Kuala Selangor				
	Imsak	Subuh	Syuru'	Zuhur	Asar
	5:53	6:03	7:13	1:16	4:39
	5:54	6:04	7:14	1:17	4:39
	5:54	6:04	7:14	1:17	4:40
	5:55	6:05	7:15	1:18	4:40
	5:55	6:05	7:15	1:18	4:41
	5:56	6:06	7:16	1:19	4:41
	5:56	6:06	7:16	1:19	4:42



Suee Lim (lima, kiri) menyampaikan cek cura kepada wakil Setiausaha Pemegang Amanah Gereja Methodist Malaysia Tamil sempena sambutan Krismas peringkat negeri di Laman MBPJ, Petaling Jaya pada 16 Disember. Foto AHMAD ZAKKI JILAN

Dekatkan hubungan rakyat, pemimpin

Perayaan pererat perpaduan rakyat

Oleh SUHAILA SHAHRUL ANNUAR

PETALING JAYA - Tradisi sambutan perayaan pelbagai budaya di negeri ini bukan saja mengukuhkan perpaduan malah mendekatkan lagi pemimpin dengan rakyat peringkat akar umbi.

EXCO Pelancongan Dato' Ng Suee Lim berkata Kerajaan Negeri percaya semangat perpaduan dan keharmonian di Selangor mampu menyemarakkan lagi ekonomi negeri terutamanya sektor pelancongan.

"Sambutan Krismas ini melambangkan perpaduan yang terus erat dan kukuh antara rakyat dan Kerajaan Negeri dalam menjayakan agenda ke-

arah keharmonian Selangor sebagai sebuah negeri yang maju," katanya pada 16 Disember.

Berucap pada sambutan peringkat Selangor di Laman Majlis Bandaraya Petaling Jaya (MPBJ) Suee Lim berkata RM4.5 juta diperuntuk Kerajaan Negeri tahun depan bagi menyemarak semangat perpaduan dalam kalangan rakyat melalui Gagasan Rumpun Selangor.

"Gagasan Rumpun Selangor melibatkan program seperti karnival dan Jelajah Perpaduan Rumpun Selangor di semua sembilan daerah negeri ini.

"Kerajaan Negeri komited dalam menyediakan pelbagai inisiatif serta program berbentuk perpaduan di Se-

langor yang akan kerap dilaksanakan di setiap daerah.

"Ini membolehkan masyarakat majuk saling bersatu-padu bagi mencapai keharmonian walaupun wujud kepelbagaiannya latar belakang," katanya.

Kira-kira 5,000 masyarakat pelbagai kaum menghadiri sambutan berkenaan yang bermula 6 petang hingga 10.30 malam. Pengunjung dihiburkan dengan persembahan koir selain menikmati aneka juadah.

Suee Lim turut menyampaikan sumbangan bernilai RM678,000 kepada 73 persatuan gereja dan badan berkaitan bagi menanggung kos baik pulih dan penganjuran program berbentuk keagamaan.

Sasar bekal air lebih bersih 2025

SHAH ALAM - Fasa pertama Visi Tengah Net Zero 2040 yang diperkenal Pengurusan Air Selangor Sdn Bhd (Air Selangor) dijangka lengkap menjelang 2025.

Pemangku Ketua Pegawai Eksekutifnya Ir Abas Abdullah berkata usaha menghasilkan tenaga boleh diperbaharu itu menyedia bekalan air terawat lebih bersih dan selamat kepada 9.1 juta pengguna.

Beliau menambah fasa pertama

dijangka lengkap sepenuhnya pada tahap tujuh peratus pada 2025 diikuti 52 peratus (fasa kedua) pada 2030 dan sepenuhnya (fasa ketiga) pada 2040.

Katanya, inisiatif itu mengurangkan kos operasi Air Selangor sekali gus pengguna menikmati bekalan air terawat bersih dan selamat yang dihasilkan menggunakan tenaga boleh diperbaharu.

Beliau berkata demikian dalam wawancara bersama Andrew Wilson

di COP28 yang disiarkan di Facebook pada 14 Disember.

Pada 30 November, Dato' Menteri Besar memaklumkan inisiatif Air Selangor itu berupaya mengurangkan kos operasi RM7 juta setahun berbanding RM387 juta yang dibayar sebelum ini.

Dato' Seri Amirudin Shari yakin Selangor menjadi negeri pertama mencapai status bebas karbon lebih awal daripada yang ditetapkan nasional pada 2050 hasil inisiatif Air Selangor itu.

Penduduk bimbang runtuhan berulang

SUBANG JAYA - Insiden tanah runtuhan di Jalan Wawasan 3/9 dan 3/14 Taman Wawasan Puchong di sini pada 16 Disember yang menjelaskan sembilan kediamaan membimbangkan penduduk berhampiran.

Kejadian luar jangka susulan hujan lebat berterusan mengakibatkan penduduk yang menetap berdekatan deretan rumah terbabit tidak dapat tidur lena.

Low Mee Yeng, 69, berkata dia sekeluarga masih trauma dengan insiden yang pertama kali berlaku di kawasan terbabit sejak menetap di situ pada 1999.

"Sekarang pun masih berhati-hati kerana hujan kerap turun waktu petang, apatah lagi kerja pemasangan cerucuk besi untuk menstabilkan tanah belum selesai," katanya ketika ditemui.

1,300 pelajar sertai karnival SPM

SHAH ALAM - Seramai 1,300 calon Sijil Pelajaran Malaysia (SPM) 2023 terpilih menyertai Karnival SPM Selangor (KSS) anjuran Yayasan Selangor di Dewan Jubli Perak, Bangunan Sultan Salahuddin Abdul Aziz Shah di sini.

Ketua Unit Komunikasi Yayasan Selangor Norhayati Umor berkata program dua hari pada 18 dan 19 Disember itu julung kali diadakan dan memberi fokus kepada pelajar berpotensi untuk cemerlang serta lulus.

Beliau berkata peserta terdiri daripada murid tingkatan lima aliran Sains dan Sastera yang dinilai sendiri oleh guru masing-masing dari 40 sekolah seluruh Selangor, lapor Bernama.

"Penceramah KSS adalah dalam kalaangan guru cemerlang di Selangor yang mempunyai kepakaran dan pengalaman dalam subjek masing-masing," katanya.

MDEC perluas penguasaan digital

AMPANG JAYA - Perbadanan Ekonomi Digital Malaysia (MDEC) menyaraskan penyertaan 40,000 orang awam dari seluruh negara untuk menyertai program yang bertujuan meningkatkan penguasaan digital.

Pengerusinya Syed Ibrahim Syed Noh menjelaskan lebih 30 lokasi disediakan untuk menganjurkan Jelajah Saya Digital (JSD) pada tahun depan yang merangkumi kawasan bandar dan luar bandar.

Katanya, seramai 19,453 penduduk di negara ini mendapat manfaat dalam program berkenaan yang diadakan meliputi 51 lokasi di seluruh negara sejak 2021.

Beliau yakin program tersebut membantu masyarakat pelbagai lapisan latar belakang serata negara termasuk di luar bandar tidak ketinggalan dalam dunia digital.

"Penguasaan kemahiran digital penting kerana ia membantu kehidupan sehari-hari dalam pelbagai peringkat," katanya pada 17 Disember.



7,000 kakitangan bantu pascabah

SHAH ALAM - Hampir 7,000 kakitangan KDEB Waste Management (KDEBWM) sedia membantu operasi pascabah jika berlaku banjir susulan fenomena Monsun Timur Laut.

Pengarah Urusannya Dato' Ramli Mohd Tahir berkata pekerja semua jabatan dengan jumlah terbesar melibatkan lebih 6,000 pekerja am serta 550 pemandu Armroll atau Roll-On-Roll-Off (RORO).

"Ini untuk pembersihan awam selepas pascabah. Kakitangan sentiasa bersedia pada bila-bila masa mengikut keperluan operasi pembersihan pascabah."

"Semua 550 RORO juga sudah dipastikan dalam keadaan baik dan boleh bergerak ke semua kawasan kendalian KDEBWM yang terjejas," katanya pada 16 Disember.

Infrasel pantas baik pulih jalan

SHAH ALAM - Syarikat selenggara jalan negeri, Infrasel Sdn Bhd (Infrasel) membaik pulih kerosakan jalan dalam tempoh 24 jam di Jalan Raja Musa, Tanjung Karang.

Agensi itu berkata kerja tampalan sementara dilakukan pada 12 Disember selepas pihaknya menerima aduan awam di laman X, #INFRASEL.

"Kerja menampal 'pothole' (lubang jalan) segera dilakukan secara tampalan sementara sebelum kaedah tampalan kekal dilaksanakan di Jalan Raja Musa, Tanjung Karang, dalam tempoh 24 jam hasil aduan orang ramai," katanya menerusi laman X.

Orang ramai diminta terus membuat aduan dengan memuat naik ciapan di laman X bersama tanda pagar #INFRASEL #NamaJalan #Daerah (jika) berlaku kerosakan jalan raya.

Tiga lokasi pejabat bergerak LZS

SHAH ALAM - Lembaga Zakat Selangor (LZS) menyediakan perkhidmatan pejabat bergerak Zakat On Wheels (ZOW) di tiga lokasi sepanjang bulan ini.

Lokasi tersebut adalah Masjid Raja Haji Fisabilillah (Cyberjaya), Masjid Bandar Baru Sungai Buloh (Sungai Buloh) dan Masjid Tun Abdul Aziz Petaling Jaya (Masjid Bulat).

"Kepada yang berdekatan terutama yang mempunyai kekangan berurus zakat di kaunter cawangan, anda boleh hadir ke sini berurus dengan kami."

"Pelbagai kemudahan disediakan antaranya taksiran zakat, pembayaran zakat, cetakan penyata zakat tahunan, permohonan bantuan dan semakan permohonan bantuan," kata di Facebook.

Perkhidmatan itu beroperasi dari jam 10 pagi hingga 4 petang. Maklumat lanjut hubungi talian 1-300-88-4343.

Bina 2,252 unit Rumah Idaman

SHAH ALAM - Permodalan Negeri Selangor Berhad (PNSB) melalui anak syarikatnya PNSB Construction Sdn Bhd (PCSB) bakal membangunkan 2,252 unit Rumah Idaman di mukim Rawang, Gombak.

Ketua Pegawai Eksekutifnya Raja Ahmad Shahrir Iskandar Raja Salim berkata projek bermula suku kedua 2024 bertepatan aspirasi Kerajaan Negeri untuk membangunkan 200,000 unit rumah mampu milik.

Beliau berkata pembinaan dengan

kerjasama syarikat operator terbesar pengangkutan bas awam Epicon Berhad dijangka mengambil tempoh antara tiga hingga lima tahun untuk disiapkan.

"Daripada jumlah tersebut, 88 unit kontra untuk Kerajaan Negeri. Bertepatan aspirasi Tawaran Kita Selangor, pembangunannya juga menepati spesifikasi Kediaman Kita Selangor," katanya.

Perjanjian konsortium antara kedua-dua pihak dimeterai pada 15 Disember

Ahmad Shahrir mewakili PNSB manaka Epicon diwakili Pengurus Ahli Lemba Pengaruhnya Ahmed Azhar Abdulla.

Ahmad Shahrir menambah penduduk yang memenuhi kriteria Lemba Perumahan Hartanah Selangor (LPHS) layak memohon dengan merujuk laman sesawang lphs.gov.my

Pembinaan 200,000 unit berharga RM250,000 ke bawah antara Tawaran Kita Selangor: Lima Tekad Untuk Lima Tahun Selangor.

Program pili cekap di masjid

Pupuk penggunaan air berhemah

Oleh **SOFIA NASIR**

PETALING JAYA - Program Pemasangan Pili Cekap Air yang akan diperluas ke seluruh negeri memberi purata penjimatan RM981.36 setahun bagi setiap masjid, kata EXCO agama Islam.

Dr Mohammad Fahmi Ngah menjelaskan inisiatif Pengurusan Air Selangor Sdn Bhd (Air Selangor) itu dijalankan membabitkan lapan masjid sebelum dikembangkan ke semua rumah ibadah tersebut.

"Sebanyak 556 paip cekap air dipasang bagi menggantikan paip sedia ada pada bulan lalu meliputi lapan masjid,"

katanya di Kompleks Tabung Haji Kelana Jaya di sini pada 15 Disember.

Majlis itu turut dihadiri Pemangku Ketua Pegawai Eksekutif Air Selangor Ir Abas Abdullah.

Lapan masjid tersebut adalah Masjid An-Nur di Glenmarie, Masjid Darul Ehsan (Subang), Masjid Al-Husna (Sunway), dan Masjid Nurul Ehsan di Taman Medan.

Selain itu, Masjid Islamiah di Kampung Lindungan, Petaling Jaya, Masjid Dato Kamaruddin (Petaling Jaya), Masjid As-Salam (Puchong) dan Masjid Kota Damansara.



Dr Mohammad Fahmi berkata program berkenaan diperluas ke semua masjid secara berperingkat sekali gus menjayakan inisiatif bawah pelan Strategi Kelestarian Air Selangor 2030.

"Sehingga pertengahan tahun ini, rakyat Selangor menggunakan 269 liter air sehari untuk setiap orang secara purata yang melebihi saranan iaitu hanya 160 liter sehari.

"Kita harap program ini membantu menjimatkan penggunaan air bagi menyokong visi Air Selangor untuk menjadi penyedia perkhidmatan air terkemuka di Asia menjelang 2030," katanya.

Tumpu 242 lokasi berisiko banjir

SHAH ALAM - Syarikat penyelenggara sampah negeri KDEB Waste Management (KDEBWM) memberi tumpuan kepada 242 lokasi berisiko banjir bagi berdepan musim tengkujuh pada masa ini.

Pengarah urusannya menjelaskan 51 lokasi terletak dalam kawasan pentadbiran Majlis Bandaraya Shah Alam diikuti

Majlis Perbandaran Ampang Jaya (47) dan Majlis Perbandaran Kajang (35).

Justeru, Dato' Ramli Tahir berharap masyarakat menjaga kebersihan longkang sekitar kediaman masing-masing dan memastikan saliran air tidak tersumbat bagi mengelakkan risiko banjir.

"Jangan buang sampah ke dalam

longkang dan tidak membuat binaan kekal atas struktur longkang kerana akan menyukarkan operasi pembersihan serta selenggara," katanya pada 16 Disember.

Ramli turut mengingatkan pengusaha kedai makan supaya tidak membuang sisa minyak ke longkang, dihaturi menyebabkan saliran tersumbat.

Pengurusan hotel beri baja organik

SHAH ALAM - Hotel Concorde Shah Alam menyumbang 220 kilogram baja organik kepada Taman Botani Negara Shah Alam bagi kegunaan tanaman pokok.

EXCO Keusahawanan Najwan Halimi menyifatkan sumbangan itu dari lebihan bahan mentah seperti ayam dan sayuran inisiatif baik yang wajar diconthohi pengusaha hotel lain.

"Penghasilan baja organik ini bermula sejak September dengan 83 peratus daripadanya bahan mentah. Usaha ini

baik untuk kelestarian alam sekitar.

"Taman Botani sentiasa mengalu-alukan mana-mana pihak yang mahu menyumbang baja organik yang boleh digunakan untuk pertanian," katanya pada 16 Disember.

Penyerahan itu disempurnakan Pengarah Jualan dan Pemasaran Hotel Concorde Shah Alam Amilia Alias kepada Pengarah Taman Botani Siti Zubaidah Mohamad sambil disaksikan Najwan.

Najwan turut menggalakkan pihak berkuasa tempatan (PBT) untuk meny-

diakan insentif sebagai galakan kepada pengusaha hotel untuk penghasilan baja organik daripada bahan mentah.

"PBT boleh fikirkan alternatif lain dalam galakan kepada pengusaha hotel untuk buat perkara sama iaitu menjadikan bahan mentah kepada baja organik demi manfaat alam."

"Selain menyumbang kepada taman botani mereka juga boleh memberikannya pengusaha kebun-kebun komuniti aktif yang diusahakan penduduk setempat," katanya.



WBS

BANGKIT! MELAWAN KEGANASAN TERHADAP WANITA DAN KANAK-KANAK.

SEMPENA KEMENGAH 16 HARI AKTIVISME MELAWAN KEGANASAN BERASASKAN GENDER

7



Dr Mohammad Khairil menerima Anugerah Pengurusan Berkualiti 2023 di Dubai, Emiriah Arab Bersatu sempena Persidangan Iklim PBB pada 30 November hingga 12 Disember. Foto Facebook PKPS

PKPS terima pengiktirafan dunia

Cemerlang kendali jualan murah

Oleh NORRASYIDAH ARSHAD

SHAH ALAM - Perbadanan Kemajuan Pertanian Selangor (PKPS) menerima Anugerah Pengurusan Berkualiti 2023 berikutan kejayaan cemerlang termasuk pengendalian Jualan Ehsan Rahmah (JER).

Ketua pegawai eksekutifnya berkata anugerah yang diterima di Dubai, Emiriah Arab Bersatu sempena Persidangan Iklim Pertubuhan Bangsa-Bangsa Bersatu (PBB) membuktikan program itu mencapai matlamat.

Dr Mohammad Khairil Mohammad Razi menjelaskan pengiktirafan berkenaan turut menilai usaha PKPS dalam mengendalikan isu jaminan bekalan makanan selepas berlaku penularan Covid-19.

Beliau menambah saringan dilakukan Persatuan Penyelidikan Berkualiti Eropah yang berpangkalan di Switzerland dengan menilai semua calon sebelum memilih PKPS sebagai penerima.

"Menurut mereka, tiada mana-mana negara melaksanakan program subsidi bersasar ini. Walaupun kecil tetapi berkesan. Ini lebih baik dari program be-

sar-besar," katanya pada 16 Disember.

Mohammad Khairil berkata PKPS akan menggandakan lagi usaha dalam merencana strategi mendepani isu bekalan makanan berikut pengiktirafan bertaraf antarabangsa itu.

"Kita khuatir beberapa isu dunia termasuk geopolitik memberi kesan kepada keperluan makanan. Jadi, kita akan terus merancang pelbagai program sebagai langkah bersedia," katanya.

JER yang diperkenal sejak tahun lalu menawarkan ayam RM10 seekor, daging pejal segar (RM10 setiap pek) dan telur gred B (RM10 seapan).

Puji usaha penghuni pangsapuri

AMPANG JAYA - Sebanyak 240 pokok pelbagai jenis ditanam di Kebun Komuniti Rumah Pangsa AU2 di Taman Keramat, Ampang Jaya sejak 2015, kata yang dipertua Majlis Perbandaran Ampang Jaya (MPAJ).

Dr Aini Ahmad berkata usaha gigih rukun tetangga pangsapuri itu diiktiraf apabila memenangi tempat ketiga Anugerah Laman Hijau Strata Negeri Selangor pada November.

"Kebun komuniti ini salah satu daripada 52 kebun komuniti di bawah pentadbiran MPAJ sejak 2015 dengan kerjasama Jabatan Pertanian Negeri Selangor.

"Pokok ditanam antaranya ulam raja, bunga kantan, serai dan pokok buah-buahan seperti nangka dan mangga. Ia termasuk pelbagai herba popular seperti tongkat ali dan kacip fatimah.

"Penanaman pelbagai jenis pokok termasuk padi bertujuan untuk membangunkan kebun komuniti menjadi hab agropelancongan dan pendidikan pertanian," katanya pada 18 Disember.

Bantu peminjam lunas pembiayaan

SHAH ALAM - Yayasan Hijrah Selangor (Hijrah) menawarkan pelan pemulihan pembiayaan kepada peminjam yang berdepan masalah kewangan.

Agensi itu memaklumkan, menerusi pelan berkenaan pihaknya akan membantu usahawan menyusun semula jadual pembayaran balik.

"Kami bersedia membantu anda dengan tawaran Pelan Pemulihan Pembiayaan bagi menyusun semula jadual pembayaran balik anda.

"Hubungi pegawai kutipan di 18 Cawangan Hijrah Selangor untuk maklumat lanjut," katanya yang turut menghargai komitmen usahawan yang tidak culas membuat bayaran semula pembiayaan.

Layari www.hijrahselangor.com/risalah-skim-hijrah.../ atau mikrokredit.selangor.gov.my/ untuk maklumat lanjut.

AQUASEL

"Kesegaran Semulajadi..."

Seltrade

UNTUK TEMPAHAN SILA HUBUNGI

IZUDDIN 011-25541110

ZARA 010-7636017

FOLLOW | LIKE | SHARE

Galak peniaga sertai program kemahiran

AMPANG JAYA - Peniaga digalak menyertai program pemberdayaan kemahiran digital bagi meningkatkan kebolehan sekali gus mengembangkan perniagaan masing-masing.

EXCO pembudayaan inovasi berkata 3,300 warga Selangor menyertai program Jelajah Saya Digital (JSD) anjuran Perbadanan Ekonomi Digital Malaysia (MDEC) sejak tahun lalu.

Dr Mohammad Fahmi Ngah berkata seramai 547 peserta menguasai kemahiran digital sekali gus meningkatkan jualan dan meraih pendapatan tinggi.

"Terima kasih kepada MDEC kerana membantu anak Selangor dan kejayaan mereka harus dijadikan contoh kepada semua terutama usahawan lain agar dapat meningkatkan ekonomi isi rumah dan menjana ekonomi negeri secara keseluruhannya," katanya pada 17 Disember.

Perluas program jualan murah

SUBANG JAYA - Jualan Ehsan Rahmah (JER) yang menawarkan jualan barang asas pada harga murah bakal diperluas ke seluruh kawasan Dewan Undangan Negeri (DUN) Seri Setia tahun depan.

Pegawai khas kepada wakil rakyatnya Mohammad Azli Jamaasim berkata usaha itu bagi memastikan tiada penduduk khususnya golongan kurang berkemampuan terlepas menikmati manfaat tersebut.

Beliau menjelaskan, jualan kelolaan Perbadanan Kemajuan Pertanian Selangor (PKPS) hanya menumpukan kawasan tertentu yang mempunyai ramai keluarga berpendapatan rendah (B40) seperti Projek Perumahan Rakyat (PPR).

"Jadi kita akan bawa (JER) ke setiap kawasan Seri Setia mengikut tarikh dan masa ditetapkan pihak berkenaan," katanya pada 16 Disember.

Pembentangan niaga hingga RM50,000

SHAH ALAM - Yayasan Hijrah Selangor (Hijrah) menawarkan pembentangan sehingga RM50,000 kepada mana-mana usahawan yang benar-benar mahu mengembangkan perniagaan mereka.

Pembentangan menerusi skim i-Bisnes itu membantu usahawan kecil dan sederhana mendapatkan modal pusingan niaga dengan kelayakan dan dokumen permohonan mudah, cepat serta tidak membebankan.

Pembentangan terbuka kepada semua sektor perniagaan. Layari www.hijrahselangor.com untuk maklumat lanjut. Permohonan dalam talian boleh dibuat menerusi pautan mikrokredit.selangor.gov.my/

Sejak 2015, Hijrah menawarkan pelbagai skim seperti Skim i-Bisnes, Skim Zero to Hero, Skim Go Digital dan Skim Pembentangan Niaga Darul Ehsan (NADI).

Penduduk harap JER diteruskan

SUBANG JAYA - Ibu tunggal di Projek Perumahan Rakyat (PPR) Lembah Subang 2 di sini menganggap penganjuran Jualan Ehsan Rahmah (JER) memudahkannya membeli barang keperluan asas.

Sholiah Ismail, 62, mengakui ternanti-nanti jualan murah kendalian Perbadanan Kemajuan Pertanian Selangor (PKPS) di kawasan tersebut selepas kali terakhir sekitar awal tahun ini.

"Sebelum ini, saya beli barang pada program JER. Selepas dimaklumkan JER kembali daripada pengurusan surau PPR, saya segera datang untuk beli apa yang patut. Mujur dekat rumah.



"Kalau tidak, susah mahu beli barang kerana saya tinggal sendirian di rumah. Tiada siapa boleh bawa ke kedai. Harapnya kekerapan JER ditambah tahun depan," katanya pada 16 Disember.

Pekerja kilang Wan Azmi Wan Harun, 35, juga menyifatkan program berkenaan memudahkannya untuk membeli barang asas tanpa perlu ke kedai runcit atau pasar raya selain harganya berpatutan.

"Bagus juga buat program sebegini dekat dengan rumah, jadi saya tidak perlu bergerak jauh untuk beli barang malah harga jauh lebih murah.

"Saya belanja RM60 dan macam-ma-

cam barang diperoleh seperti ayam, telur serta daging. Diharap program ini diadakan seminggu sekali di kawasan PPR Lembah Subang 2," katanya.

Bagi ibu kepada tiga anak Tengku Noor Iswani Raja Ismail, 33, pengajuran di PPR itu melegakan penduduk yang kebelakangan ini terbeban dengan kenaikan kos sara hidup.

"Di sini majoriti golongan berpendapatan rendah (B40) dan asnaf, jadi jualan murah seperti ini sekurang-kurangnya membantu menjimatkan perbelanjaan kami.

"Jika di kedai lain susah mahu dapat beras tempatan, apakah lagi harganya mahal. Di JER, penduduk boleh beli dengan harga RM10," katanya.

Pengunjung sanggup tunggu giliran

Mutu barang setaraf pasar raya

Oleh SUHAILA SHAHRUL ANNUAR

SUBANG JAYA - Mutu barang setanding pasar raya meski harganya 30 peratus lebih murah mendorong golongan berpendapatan rendah ternanti-nanti program Jualan Ehsan Rahmah (JER).



Kakitangan swasta Leezam Kamaruzaman, 48, mengakui tidak kesah menunggu giliran bagi membeli barang di situ lantaran kualiti produk terjamin dan tidak pernah mengecewakan.

"Barangan basah yang dijual di sini segar manakala beras pula bermutu. Bukan hanya saya yang puji, rata-rata

pembeli berpuas hati dengan kualitiinya," katanya.

Beliau antara pengunjung program kendalian Perbadanan Kemajuan Pertanian Selangor (PKPS) peringkat Dewan Undangan Negeri (DUN) Seri Serdang di Surau Nurul Ikhlas pada 18 Disember.

Bagi Nur Farhana Mohamed Yusoff, 37, niat mahu mencuba barang di sini pada kunjungan pertama sebelum ini berbaloi seterusnya mendorong beliau hadir kali kedua.



"Saya terkejut. Barangan tiada banyak dengan kualiti di pasar raya tetapi harganya jauh lebih murah. Diharapkan program sebegini diteruskan tahun

depan," katanya.

Ahli Dewan Negeri Seri Serdang Abbas Azmi pula menjelaskan sistem nombor giliran dengan memberi keutamaan kepada pengundi kawasan berkenaan supaya mereka tidak terlepas peluang.

"Kita tahu ada sebilangan rakyat dari kawasan lain datang (memang tidak salah) tetapi akhirnya penduduk atau pengundi tempatan tidak dapat beli. Selain itu ada juga pengundi luar."

"Setelah kita kenal pasti masalah ini, kita pastikan nombor giliran diberi kepada pengundi (Seri Serdang) dahulu. Kalau ada lebih, baru buka kepada pengundi luar," katanya.

100 ekor ayam laris dalam sejam

KLANG - Lebih 100 ekor ayam terjual dalam tempoh sejam program Jualan Ehsan Rahmah (JER) di Balai Majlis Pengurusan Komuniti Kampung (MPKK) Cempakasari di sini.

Pegawai Penyelaras Parlimen Kapar Nasya Azwin Misnan memaklumkan penduduk sanggup beratur seawal jam 7.30 pagi meski kaunter hanya dibuka sejam kemudian.

"Penduduk tidak kesah menunggu kerana mereka mahu mendapatkan barang keperluan asas pada harga murah," katanya.

Beliau menambah Perbadanan Kemajuan Pertanian Selangor (PKPS)

juga membawa barang lain antaranya sos, biskut dan sotong selain enam barang keperluan asas.

"Ini sebahagian usaha mempromosi barang keluaran PKPS yang kini digemari kebanyakan penduduk," katanya pada 17 Disember.



Laili Alang, 64, pula tidak pernah melepaskan peluang untuk ke jualan murah bagi membeli keperluan dapur seperti ayam, ikan dan beras.

"Jualan ini bagus dan membantu

golongan kurang berkemampuan. Contohnya saya dan suami tidak bekerja, hanya bergantung pemberian anak, pasti jualan ini meringankan beban.

"Saya berpeluang beli biskut jagung daripada PKPS kerana kawan-kawan cakap sedap, jadi mahu mencubanya. Saya harap jualan ini dapat diteruskan lagi demi membantu rakyat," katanya.

Pekerja swasta Muhammad Zaki Mat Nazir, 31, berkata belum kali pertama mengunjungi jualan murah anjuran PKPS dan menyifatkan program tersebut sangat bermanfaat kepada rakyat.



Kek khas Hari Natal



Oleh INTAN SYUHADA AKHIR

Meski berbeza agama, kasih sayang antara penyanyi Marsha Milan dengan keluarganya yang beragama Kristian tetap erat.

Walau melafaz syahadah dan bernikah dengan suami Mohamed Shaiful Nizam Mohamed Ismail sembilan tahun lalu, Marsha tetap meraikan Hari Natal.

Setiap tahun, pemilik nama penuh Marsha Milan Londoh, 38, bercuti untuk pulang ke kampung halaman di Tamparuli, Sabah untuk menyambut Krismas.

Bersyukur hubungan persaudaraan tidak putus kerana pilihan agamanya, bekas peserta program realiti Akademi Fantasia itu menepis tanggapan segelintir pihak bahawa tidak boleh menyambut perayaan agama lain kerana sudah Islam.

“Saya pernah bertanya kepada ustaz mengenai hukum perayaan. Nasihatnya sentiasa memasang niat yang baik dalam menjaga hubungan silaturahim dengan keluarga.

“Jadi, Hari Natal mahupun Aidilfitri adalah perayaan yang saya nantikan kerana itulah masanya saya pulang ke kampung dan meluangkan masa bersama keluarga,” katanya pada 13 Disember.

Menyifatkan keluarganya berfikiran terbuka, suami Marsha juga tidak pernah kekok dan mudah menyesuaikan diri untuk meraikan Krismas bersama-sama.

Pelantun lagu Kembali Terang itu pulang ke kampung pada 23 Disember dan meluahkan rasa tidak sabar untuk berkumpul bersama ahli keluarga.

Padanya, itulah saat menyeronokkan kerana dapat bertanya khabar dan bertukar cerita dengan saudara-mara selepas lama tidak bersua.

Beli hadiah

Bercerita mengenai keraian Hari Natal keluarganya, anak kedua daripada tiga beradik itu bersederhana menyambutnya.

Namun istimewanya, setiap tahun adik-beradik Marsha akan membuat kek pelbagai perisa,

kemahiran yang diwarisi daripada ibu, Missie, 69.

“Setiap tahun kami akan buat kek bersama-sama tak kiralah perisa coklat ataupun lobak merah. Masing-masing ada selera berbeza.

“Mak saya memang ada buat perniagaan kek perkahwinan atau ulang tahun kelahiran di kampung. Jadi, kek memang menu wajib kami,” katanya.

Selain kek, keluarga Marsha turut memilih menu nasi berlauk untuk dihidangkan kepada saudara-mara dan tetamu yang bertandang ke rumah mereka.

Untuk sambutan Krismas tahun ini, pemenang tempat kedua Anugerah Juara Lagu (AJL) 2021 itu sudah membeli sejumlah hadiah untuk diberi kepada setiap ahli keluarganya.

Malah, Marsha sudah berpakat dengan kakaknya untuk menyembunyikan hadiah berkenaan agar tidak diketahui ahli keluarga lain.

Bercerita mengenai kerjaya, pada 17 Disember Marsha diumum mara ke pentas akhir AJL 38 menerusi lagu Darah.

Lagu ciptaan Naim Daniel dan Firdaus Rahmat itu akan bersaing meraih gelaran juara bersama 11 lagu lain di Stadium Axiata Arena, Kuala Lumpur pada 3 Mac, tahun hadapan.

Meski gementar kerana lagu itu bukan genre yang selalu dipersembahkan, beliau tetap bersemangat kerana mahu mengetengahkan karya terbaik demi mengangkat mutu industri muzik negara.

Marsha tidak meletakkan harapan menang dalam anugerah itu, sebaliknya hanya ingin memberi persembahan terbaik pada pentas akhir sebagai menghargai sokongan peminat.

Pada AJL 2022, Marsha meraih tempat kedua dan kategori persembahan terbaik.



Seni bina 100 tahun

Oleh NADIAH ZAMLUIS
Foto NUR ADIBAH AHMAD IZAM

Gereja Our Lady of Lourdes (OLL) yang berusia hampir 100 tahun antara rumah ibadat di bandar Klang yang disenaraikan sebagai laluan Jejak Warisan Kerohanian.

Dibina pada 1928, gereja putih di tengah-tengah bandar itu berdekatan Kuil Sri Sivan dan Kuil Kyan Yim serta Masjid India Muslim Tengku Kelana, semuanya dalam lingkungan satu kilometer.

Laluan tersebut sebahagian daripada program Jejak Warisan Bandaraya Diraja Klang yang terdiri daripada enam laluan bersejarah sempena pengisytiharan bandar raya.

“Laluan (Jejak Warisan Kerohanian) ini bakal membawa pengunjung melihat bangunan rumah ibadat seperti masjid, kuil, tokong dan gurdwara.

“Semuanya terletak berdekatan antara satu sama lain, melambangkan keharmonian pelbagai agama Bandaraya Diraja Klang,” kata Kurator Majlis Perbandaran Klang (MPK) Faisal Surani. Selain

laluan kerohanian, program itu juga meliputi Jejak Warisan Diraja, Jejak Warisan Kota Raja, Jejak Warisan Pekan Lama, Jejak Laman Seni Safari dan Jejak Pesona Selera Warisan.

Gereja OLL dibina Paderi Souhait dari Perancis yang mahir dalam bidang artitek untuk kegunaan pedagang dan pekerja yang berulang alik dari Kuala Lumpur ke Pelabuhan Klang.

Ukiran kaca pintu utama juga kekal sejak 1920-an. Dibawa dari Eropah, hiasan yang dipanggil ‘tingkap mawar’ itu berwarna-warni sekali gus menjadi daya tarikan utama.

Kerusi panjang menggunakan kayu cengal masih kukuh manakala pintu masuk dengan rekaan klasik yang mengelilingi bangunan itu juga kekal utuh.

Sentuhan Eropah

Gereja itu menggunakan seni bina Goth dari Perancis dengan rekaan kubah tinggi dan tajam. Reka bentuknya hampir menyamai gaya rumah ibadat sama di Eropah. Seni itu digunakan gereja sejak berabad-abad lamanya.

Gereja Basicila Saint Denis di Paris yang dibina pada 1135 dipercayai

rumah ibadat Kristian pertama dibina menggunakan seni bina Goth atau lebih sinonim dipanggil Gothic.

Pada masa ini, gereja berkeluasan dua ekar yang bersebelahan Taman Bandar Diraja Klang kini boleh menampung lebih 500 orang berbanding sebelumnya 100 pengunjung.

Menurut Paderinya Gregory Chan, gereja tersebut yang kerap dikunjungi penganut Kristian dari Singapura atas faktor seni bina turut menjadi tumpuan peminat sejarah dan fotografi.

“Kami tidak menutup pintu gereja. Sesiapa sahaja boleh masuk melihat seni bina dan memahami sejarah bangunan tua ini.

“Lagi empat tahun, gereja ini mencelah usia 100 tahun, kami sedaya upaya mengekal seni bina lama ini. Cat berwarna putih tidak pernah ditukar. Apatah lagi bahagian dalamnya,” katanya sempena sambutan Hari Krismas.

Namun, kos penyelenggaraan bangunan itu tinggi iaitu RM200,000 setiap tahun. Pengurusan gereja memperoleh pendapatan menerusi sewa bangunan kolej bersebelahan selain peruntukan negeri.

Gereja itu juga menjadi tempat berlindung lebih 100 mangsa banjir tanpa mengira kaum dan agama ketika bencana luar biasa itu melanda Selangor pada 2021. Mereka turut dijamu hidangan percuma dari pagi hingga ke malam.

“Ketika banjir, kita buka pintu seluas-luasnya. Mereka duduk di sini, tidak bermakna datang ke gereja, agama ditukar. Konsep rumah ibadat kita sama, melindungi mereka yang lemah,” katanya.



Tradisi pokok Krismas

Oleh ABDUL RAHIM SABRI

Pokok Krismas yang menjadi hiasan lazim dalam sambutan Hari Natal di seluruh dunia termasuk Malaysia khususnya kalangan penganut Kristian bermula di Jerman pada abad kelapan.

Tradisi hiasan sedemikian diperkenal Biarawan Santo Boniface bagi menggantikan pohon oak yang menjadi sembahyang penduduk yang mengamalkan paganisme.

Menurut Canselor Archdiocese Kuala Lumpur Clarence Devadass, legenda itu dikatakan menebang pokok oak tersebut untuk menghentikan pemujaan itu seterusnya menyeru mereka kepada agama Kristian.

Beliau kemudian dikatakan mengambil pokok fir di belakang pohon oak yang ditumbangkannya dan memberi gambaran lambang pohon kedamaian dan simbol kehidupan kekal.

"Kerana daunnya yang kekal hijau sepanjang tahun dan bagaimana ia meruncing ke atas (seolah-olah) menunjuk ke arah syurga," katanya yang juga pengarah Pusat Penyelidikan Katolik kepada Selangorkini.

Amalan tersebut berkembang dan berevolusi mengikut peredaran masa. Pada kurun ke-16, penduduk Jerman Barat mula menghiasi pokok itu dengan kekacang, buah epal dan biskut halia.

Budaya itu kemudian tersebar ke seluruh Eropah dan Amerika pada pertengahan abad ke-18. Penggunaan pokok tersebut juga dipopularkan orang kenamaan dan kerabat diraja pada kurun berikutnya.

Meski mengakui pokok itu hanya hiasan menjelang perayaan Krismas tetapi Clarence menegaskan ia juga "suatu simbol Krismas yang membawa makna mendalam" dan "bukan dekorasi semata-mata".

"Hiasan pada pokok Krismas dan hadiah dibawah pokok itu berkembang selama bertahun-tahun. Kebanyakan pokok Krismas ada bintang atau sudut di bahagian atas.

"Ia menandakan bintang baru yang muncul ketika Jesus dilahirkan," katanya yang turut mengakui pemasangan pokok Krismas di rumah penganut Kristian tidak wajib, bukan sebahagian dari agama.

Santa Claus

Pada masa ini, sebahagian penganut Kristian di Malaysia memasang pokok Krismas baik yang tiruan maupun pohon asli dengan disertai pelbagai hiasan tambahan.

Situasi hampir sama juga berlaku dalam kisah popular iaitu Santa Claus, lelaki berpakaian serba merah yang membawa aneka hadiah kepada kanak-kanak menjelang sambutan Krismas.

Ia dikatakan bermula daripada kisah Saint Nicholas, bishop dari Bari, Itali yang pemurah, baik hati dan sentiasa merendah diri. Beliau dikatakan membelanjakan kekayaannya untuk membantu orang lain.

Namun, Clarence menganggap gambaran Santa Klaus duduk di kereta luncur salji sambil

ditarik beberapa ekor rusa ketika mengagihkan hadiah kepada kanak-kanak mitos semata-mata.

"Tetapi mesejnya mustahak iaitu kita harus berkongsi anugerah dan rezeki Tuhan antara satu sama lain, terutama sekali dengan golongan kurang bernasib baik.

"Kisah itu menjadi teladan kepada penganut Kristian untuk saling berkongsi dan memberi antara satu sama lain terutama kepada yang sangat memerlukan terutama dalam musim Krismas," katanya sempena sambutan Hari Krismas.

Tinjauan Selangorkini pada 14 hingga 16 Disember mendapat pokok sedemikian mudah didapati di kebanyakan pusat beli-belah dan kedai tertentu sama ada sebagai produk jualan ataupun sekadar hiasan.



Pengurus kedai LJ Beauty Nail di Subang Parade, Subang Jaya Lucy Joseph menjelaskan simbol pokok Krismas dan lampu membawa maksud kegembiraan apabila Jesus dilahirkan.

Pengurus Kedai Butik Penjual Barang Kelengkapan Dapur/Rumah di Sunway Pyramid, Subang Jaya juga menganggap pokok itu penting sebagai tanda sambutan hari kelahiran Jesus.

"Kalau kita letak, kita akan rasa sendiri (sambutan Krismas semakin hampir). Bintang di pokok itu (bermaksud) hendak berkehidupan yang lebih baik," kata Roy Yeem Ky.

Pekerja sambilan Morning Cafe, Seksyen 15, Subang Jaya pula menyifatkan perayaan Krismas tidak lengkap atau kurang meriah tanpa pokok berkenaan.

"Tidak bolehlah tidak ada pokok sebab ia perkara utama. Kalau tidak ada pokok, tidak cantik, tidak sempurna," kata Koh Eng Hor lagi.





EXCO Pembangunan Wanita Anfaal Saari menghadiahkan bunga kepada tetamu selepas pelancaran Kempen Sayangi Wanita pada 7 Disember



EXCO Belia Najwan Halimi menyampaikan sijil penghargaan reruai terbaik kepada salah seorang pempamer pada 10 Disember



Pengurus Syarikat Nusa Book Habeeb Mohd menunjukkan buku 100 Warkah 1000 Impian Anwar PM-10 jilid satu dan dua pada 2 Disember



Sultan Sharafuddin menyampaikan plak penghargaan kepada wakil negara luar bawah Selangor Fellowship International pada 1 Disember



Pesta buku mendapat sambutan menggalakkan dengan kehadiran ribuan pengunjung pada 2 Disember



Orang ramai menyaksikan persembahan daripada Konservatori Muzik Kolej Pengajian Seni Kreatif Universiti Teknologi Mara pada 1 Disember



Penyanyi Faizal Tahir yang juga Ikon Kemanusiaan Cinta Syria Malaysia berkongsi pandangan dalam program bual bicara pada 9 Disember

Membudaya ilmu



Sultan Sharafuddin diiringi Amirudin membelek beberapa karya menarik di reruai Inisiatif Buku Darul Ehsan (IBDE) selepas majlis perasmian pesta buku pada 1 Disember



Kanak-kanak menyertai acara bento iaitu menyediakan makanan lengkap nutri mengikut tradisi Jepun pada 10 Disember



Pengunjung menonton filem Jombo Fi Sabilillah yang diadaptasi daripada novel karya penulis Indonesia Asma Nadia pada 2 Disember



Perkhidmatan bugi disediakan untuk orang ramai yang mengunjungi pesta buku sepanjang 10 hari pameran



Sekumpulan pelajar teruja meneliti aneka buku di sebuah reruai pada 5 Disember



Beberapa kanak-kanak tekun membaca komik pada 2 Disember. Pesta buku turut menampilkan artis komik dalam sesi bersama pengunjung

Pesta Buku Antarabangsa Selangor (SIBF) 2023 menggambit 250,000 pengunjung ke 354 reruai yang dibuka pada jam 9 pagi hingga 9 malam sepanjang 10 hari pengajuran sehingga 10 Disember.

Bertempat di Pusat Konvensyen Majlis Bandaraya Shah Alam (MBSA), acara anjuran Perbadanan Perpustakaan Awam Selangor (PPAS) itu dirasmui Duli Yang Maha Mulia (DYMM) Sultan Selangor Sultan Sharafuddin Idris Shah Alhaj pada 1 Disember.

Keberangkatan Baginda dan DYMM Tengku Permaisuri Selangor Tengku Permaisuri Hajah Norashikin disambut Dato' Menteri Besar Dato' Seri Amirudin Shari dan Pengarah PPAS Datuk Paduka Mastura Muhamad.

Mula dianjur sebagai Pesta Buku Selangor pada 16 tahun lalu, pameran itu bermula di Kompleks PKNS sebelum bertukar ke Pusat Konvensyen MBSA yang merekod hampir lima juta pengunjung.

Edisi tahun ini disertai 156 penerbit termasuk dari negara luar seperti Nepal, Azerbaijan, Indonesia, Filipina, Australia, Korea, Turkiye dan China.

Selain pelbagai genre buku dijual dengan harga murah, banyak program menghiasi SIBF 2023 sebagai tarikan antaranya cabutan bertuah, tayangan filem dan sesi bertemu penulis.

Lensa FIKRI YUSOF, HAFIZ OTHMAN, NUR ADIBAH AHMAD IZAM dan foto ihsan PPAS merakam kemeriah SIBF 2023. Keterangan oleh HAFIZAN TAIB.



Penyanyi rock Ella melancar dan mempromosikan bukunya berjudul Ella: Rockers Juga Manusia ketika pesta buku pada 8 Disember



Penulis buku Nor Azhar Ishak atau Uncle Nai bersama kumpulan kanak-kanak dalam program Berhibur Dengan Cerita pada 2 Disember

Pesta ulat buku



Oleh NADIAH ZAMLUS
Foto FIKRI YUSOF

Lebih 250,000 orang daripada pelbagai lapisan usia mengunjungi Pesta Buku Antarabangsa Selangor (SIBF) 2023 sepanjang 10 hari pengajuran yang berakhir pada 10 Disember.

Aneka genre buku, daripada kanak-kanak hingga dewasa, menggantik pencinta buku dalam program di Pusat Konvensyen Majlis Bandaraya Shah Alam di Seksyen 13.

Selain 354 reruui melibatkan 225 pempamer tempatan, pempamer luar negara antaranya United Kingdom, Turkiye, Korea, Mesir, Indonesia, Singapura dan China turut memeriahkan acara.

Perasmian program kendalian Perbadanan Perpustakaan Awam Selangor (PPAS) itu disempurnakan Duli Yang Maha Mulia Sultan Selangor Sultan Sharafuddin Idris Shah Alhaj.

Nur Azlene Zainal Abidin, 36, guru yang 13 tahun berkhidmat di sebuah tadika di Kuala Lumpur menyifatkan pengajuran pesta tersebut memudahkannya mencari bahan pembelajaran.

“Ini kali kedua saya datang ke pesta buku anjuran Kerajaan Selangor. Benda wajib yang saya cari lembaran kerja dan buku aktiviti untuk kegunaan anak murid.

“Banyak pilihan dan harga jauh lebih murah berbanding kebiasaan. Jadi, sesuai untuk guru di luar mencari bahan pembelajaran,” katanya.

Bagi pelajar Universiti Teknologi Mara Rabiatul Adawiyah Zahari, 20, sesi bersama

penulis antara tarikan yang dinanti-nanti peminat buku termasuk beliau sendiri.

“Ini bukan kunjungan pertama. Saya gemar membaca buku puisi, dakwah dan novel. Jika bertuah boleh bertemu penulis kerana ada penerbit buat sesi bertemu bersama penulis,” katanya.

Karya laris

Muhammad: Riwayat Hidup Berdasarkan Sumber Terawal terbitan Inisiatif Buku Darul Ehsan dan 100 Warkah 1,000 Impian Anwar PM-10 terbitan Nuha Books yang menghimpunkan pandangan 100 rakyat Malaysia antara judul yang menjadi rebutan.

Tidak ketinggalan, novel Salina

karya Sasterawan Negara Datuk Seri A Samad Said yang diterjemah 38 negara luar. Selain itu, novel Gadis Kretek juga diminati ramai pembaca tempatan.

Pengarah Urusan Media Inspirasi Nusantara Sdn Bhd Nabieh Rahmat mengambil inisiatif mengumpulkan penerbit dan penulis Indonesia untuk membuka reruui berikutan ada permintaan daripada pembaca di Malaysia.

Asma Nadia, penulis berasal daripada republik itu, yang pertama kali menyertai pesta buku anjuran Selangor turut menganggap acara berkeraan mengerakkan silaturahim kedua-dua negara.

“Sebelum ini, saya sertai Pesta Buku Antarabangsa Kuala Lumpur. Kali ini saya ikuti SIBF, memang teruja. Acara luar biasa dan saya ia harap diteruskan, menjadi lebih besar selain memberi inspirasi kepada negara lain untuk anjurkan pesta buku seumpama ini,” katanya.

Program Selangor Fellowship Antarabangsa iaitu usaha menterjemah buku yang diperkenal SIBF tahun lalu juga mendapat perhatian. Bermula empat, kali ini tujuh negara menyertai inisiatif tersebut.

“Buat julung kali, peserta negara terlibat program fellowship setuju menterjemah buku mereka. Negara yang menyertai program ini ialah Malaysia, Turkiye, Korea Selatan, Australia, Nepal dan Indonesia.

“Ini peluang cerah untuk penulis dan penerbit daripada negara terlibat program menterjemah buku berkualiti dan dijadikan projek rintis,” kata Pengarah PPAS Datin Paduka Mastura Muhamad.

Dato’ Menteri Besar Dato’ Seri Amirudin Shari juga menaruh keyakinan SIBF yang dulunya dikenali sebagai Pesta Buku Selangor antara 2006 hingga 2021 antara yang terbaik di Asia Tenggara.

“Pengalaman melawat pengajuran pesta buku di pelbagai rantau seperti di Jakarta, saya yakin SIBF menjadi program pengumpulan buku dan perkongsian idea terbaik di Asia Tenggara,” katanya.

Rencana ini diolah daripada berita Zareef Muzammil, Sheeda Fathil dan Siti Rohaizah Zainal



Pembebas al-Quds



MARWAN BUKHARI A HAMID
ialah penulis dan penterjemah.
Lulusan Universiti Yarmouk,
Jordan dan Universiti
Sains Islam Malaysia

Al-Aqsa dikepung selama empat bulan, tetapi tentera Rom masih tidak mahu menyerah. Dipendekkan cerita, setelah itu panglima tentera Muslim memberi kata putus sama ada mereka mahu berdamai dengan cara memeluk Islam atau kekal dalam agama mereka tapi perlu membayar jizyah, ataupun memilih untuk perang.

Ketua Gereja Jerusalem ketika itu, Patriark Sophronius memilih jalan perdamaian.

Namun, ada suatu yang aneh terjadi iaitu Patriark bertegas mahu Khalifah Umar al-Khattab sendiri membuka al-Quds (atau dikenali sebagai Aelia ketika itu).

Sesetengah catatan sejarah menyebut bahawa perkhabaran tentang Umar sebagai pembuka al-Quds terdapat dalam kitab-kitab suci mereka.

Setelah dimaklumkan hal itu, Umar bermesyuarat dengan sahabat Rasulullah SAW iaitu Uthman Affan dan Ali Abu Talib. Uthman kata tidak, sebaliknya Ali kata ya.

Umar bersetuju dengan Ali, lalu beliau menuju Aelia bersama bala tenteranya. Ali memangku tugasnya di Madinah.

Umar bertemu panglima-panglima perang di Jabiyyah (terletak antara Dataran Hawran dan Bukit Golan).

Pertemuan ini berlaku setelah dua tahun tidak bertemu kerana terlibat dalam beberapa ekspedisi ketenteraan.

Kedua-dua peristiwa mesyuarat dan pertemuan ini menunjukkan satu peribadi penting kepemimpinan Umar iaitu tidak buat keputusan sendirian.

Jaminan Umar

Itulah didikan al-Quran dan Nabi SAW kepadanya menerusi konsep syura.

Mesyuarat ialah budaya penting bagi pemimpin dan masyarakat Muslim, malah itu mengelakkan seseorang daripada menjadi diktator.

Setelah tiba di Baitulmaqdis iaitu pada 16 Hijrah, Patriark itu pun keluar. Umar memberi jaminan keselamatan kepada mereka.

Patriark menyerahkan kunci-kunci al-Quds kepada Umar.

Umar memasuki Baitulmaqdis menerusi pintu

yang dimasuki oleh Rasulullah SAW semasa Israk Mikraj.

Ketika beliau sedang duduk di ruang tengah Gereja al-Qiyamah, waktu solat masuk, lalu beliau keluar dan mendirikan solat bersendirian di atas anak tangga berdekatan pintu gereja.

Beliau berkata kepada Patriark, "sekiranya aku mendirikan solat di dalam gereja itu, pasti umat Islam selepasku akan mengambil gereja ini dan mengatakan bahawa 'Umar mendirikan solat di sini!'

Menerusi peristiwa ini, 'Umar menunjukkan Islam sebagai agama toleransi dan keamanan.

Tambahan pula, beliau mengadakan perjanjian dengan masyarakat Kristian yang diketuai oleh Patriark.

Perjanjian ini terkenal dengan dengan nama al-'Uhdah al-'Umariyya.

Berikut ialah teks perjanjian bersejarah itu:

"Ini adalah jaminan keamanan kepada penduduk Aelia yang dikurniakan oleh hamba Allah, Umar (Ibn al-Khattab) selaku Amir al-Mu'minin.

Beliau telah mengurniakan mereka satu jaminan keamanan untuk kehidupan dan harta benda mereka, gereja-gereja dan salib-salib mereka, yang melibatkan semua sama ada yang sakit dan sihat serta seluruh komuniti agama.

Gereja-gereja mereka tidak boleh diambil alih, dimusnahkan atau dirosakkan sebagaimanya dan diambil khazanahnya. Salib dan sebarang harta benda mereka tidak boleh diceroboh.

Penduduk mereka tidak boleh dipaksa dalam beragama dan tidak juga boleh dianiaya. Tiada orang Yahudi dibenarkan mendiami Aelia bersama mereka.

Penduduk Aelia perlu membayar jizyah sebagaimana penduduk kota-kota yang lain berbuat demikian. Mereka perlu mengusir orang Rom Timur dan perompak.

Sesiapa dalam kalangan mereka (kumpulan Rom Timur yang pertama) yang perlu meninggalkan Aelia, nyawa dan harta benda mereka akan dilindungi daripada bahaya sehingga mereka tiba di tempat yang ada keamanan.

Sementara itu, bagi mereka (kumpulan Rom

Timur kedua) yang memilih untuk tinggal, mereka akan selamat serta perlu membayar jizyah sebagaimana penduduk Aelia.

Penduduk Aelia yang mahu pergi bersama orang-orang Rom Timur beserta harta benda mereka serta mahu mengosongkan gereja dan salib mereka, maka mereka dan semua benda itu akan selamat sehingga tiba di tempat yang aman."

Menurut cendekiawan agung Mesir abad ke-20, 'Abbas al-'Aqqad: "Jaminan sebegini tidak pernah ingin dilakukan oleh mana-mana pemimpin dalam apa-apa tamadun sebelum Umar." ('Umar al-Khattab: Kebijaksanaan Sebagai Pedang terbitan Inisiatif Buku Darul Ehsan dengan kerjasama Media Selangor Sdn Bhd)

Pakaian biasa

Sekali lagi, kita melihat kebijaksanaan pemerintahan Umar yang menggunakan rundingan dan perjanjian.

Ini mirip dengan teladan mahagurunya, Rasulullah SAW yang pernah membuat perjanjian bernama Piagam Madinah. Perjanjian dan rundingan penting untuk hidup damai bersama.

Menurut catatan Ibn Khathir dalam al-Bidayah wa al-Nihayah, ketika membukanya, Umar berpakaian biasa sahaja. Ada yang mencadangkanannya berpakaian gah dan menaiki kenderaan mewah.


Tetapi Umar yang terkenal tawaduk enggan kerana kemuliaan dikurniakan oleh Allah menerusi pedoman Islam tanpa memerlukan selain itu.

Demikianlah intisari peristiwa bersejarah pembukaan Umar terhadap Aelia yang kemudian ditukar nama sebagai al-Quds itu.

Pembukaan itu penuh dengan nilai untuk diteladani oleh masyarakat hari ini. Banyak lagi babak dan pengajaran lain namun tak termuat dalam ruang kecil ini.

Sukar sekali untuk kita membayangkan hal tersebut hari ini di sebalik realiti kekejaman rejim zionis Israel yang menggasas termasuk membantai kanak-kanak, wanita, hospital, masjid, gereja, kem pelarian, wartawan dan segalanya.

Namun, segala usaha, kecekalan dan pengorbanan rakyat Palestin serta solidariti antarabangsa menjadikan kita optimis bahawa tidak lama lagi penindasan terhadap mereka akan berakhir, sementara zionis akan mendapat pengakhiran yang memalukan.



Aduka, dan dunia diam di dalam segaris luka

Oleh AZRIN FAUZI


Ilustrasi FAHMI MUSTAFFA

Segaris Luka di Palma—Engkau dimatikan sekejap sebelum terjaga pada pagi yang lebih terik daripada biasa dengan sebelah tangan yang berbalut. Terjaga sebaik sahaja kucing hitam hampiri tangan berbebat yang tergantung di tepi katil untuk menjilat hujung jari-jemari yang makin dilekitkan tanda tanya. Tangan yang berbalut belum menggenggam sebarang jawapan. Dengan kudrat untuk mengingat, ingin kaucengkam detik-detik hangat di ruang terlaknat yang kaufikir selamat—di besmen?—tetapi saat-saat lepas ialah lampias ingatan yang licin dan deras, tidak mampu kaupegang apa-apa. Geling.

geling kucing hitam sebelum lincah berlari mencari-cari sudut tergelap di dalam bilik. Kucing hitam: sembunyikan jawapan dalam setiap ngiauan? Engkau: dengan kepala digulung pertanyaan demi pernyataan. Yang ingin kauleraikan. “Kenapa tanganku berbalut?” Hanya kerana segaris luka. “Bilanya tangan ini dibalut?”

Sejak empat hari yang lalu...

“Empat hari yang lalu? Aku dah tak sedarkan diri selama empat hari!” Sejak empat minggu yang lalu. Barangkali empat bulan. Atau empat tahun. “Yang mana satu?” Hanya satu, satu garis luka. Semata-mata. “Semata-mata?” Semata, mata. “Yang belum sembuh?” Maaf, tidak akan sembuh. Engkau ingin lesapkan luka, berparut pun tidak mengapa, untuk kembali mengusap kucing hitam penemanmu. Dan engkau ingin lenyapkan luka, untuk semahu-mahu hilangkan bayang pisau yang tertinggal di palmamu—maaf, takkan sembuh. Engkau meraba-raba saki-baki masa lalu yang membungkus tangan itu. Dengan bebatan yang menyembunyikan segaris luka di palma. Satu garis luka yang bersuara—membisik—di antara dua kata: jangan buka. Entah sudah berapa hari-minggu-bulan-tahun engkau mendekam di dalam bilik ini. Entah sial apa yang telah tangan engkau lakukan. Tangan yang hanya ingin membelai kucing belaan. Juga tangan yang hanya ingin membungkus dosa-dosa yang



penuh dalam cerita. Yang terjadi di besmen mesti dikisahkan semula: Pada waktu engkau menapak ke arah dua orang laki-laki sedang berkucupan di dalam sebuah kereta. Mereka bukan pasangan kekasih. Bukan siapa-siapa. Mereka tercampak jauh dari rumah masing-masing sehingga terpaksa temukan mana-mana besmen yang kenakan kadar percuma untuk sejam pertama—untuk mereka berdua menjadi diri sendiri walau sementara. Mereka pemandu-penumpang dengan pandang pertama hanyalah wajah songgang masing-masing pada cermin pandang belakang di dalam kelam kereta. Malam pun membongkok di

belakang senja. Dan pada detik itulah kaudekati mereka dengan sebilah pisau lipat yang sering temani ke mana-mana.

“Jahanam!” Kata terkesat yang sudah kaulupa terpacul daripada mulut siapa. Kerana mata siapa yang terlebih dahulu menangkap siapa?

Di balik tiang-tiang tebal sebagai pasak yang dahulunya ghairah menghunjam alam? Mata siapa yang lebih awal melucutkan aib siapa?

Mata pisau memantulkan rasa malu dan benci daripada mana-mana wajah bertiga. Ah, mengapa tangan engkau yang terluka? Mengapa—“Aduka!”

Jerit engkau kepada kucing hitam dek balutan yang dilerai. Jangan buka. Nah, mata engkau yang galak mengintai! Masing-masing pun membisu, menahan pedih sendiri. Engkau merenung mereka di dalam segaris luka. Dan mereka merenung engkau. Begitu tajam.

Segaris Luka di Langit—Kami ditinggalkan diam-diam di dunia sejurus selepas lamunan panjang pada hari yang lebih gelita daripada biasa. Kami bukannya cahaya mata sesiapa; bukan siapa-siapa; kami belum pernah disentuh cahaya kerana belum pernah punya mata.

Mujurlah punya telinga. Sesekali terdengar bunyi ngiauan mencakar sunyi dunia. Kami dibuang ke dunia untuk melengkapkan sebuah ramalan. Ramalan yang akan menyelesaikan hari-hari tanpa mata generasi terdahulu. Ramalan leluhur yang sudah sekian lama dalam kebutaan, dalam kedua-dua. Bermuram durja kerana tidak pernah melihat? Atau duka sampai buta? Atau ada yang permain ramalan dengan mengintip masa depan? Ramalan: kami akan peroleh mata, akan mampu mengcap-

bahagia disentuh cahaya. Yang maya akan menjadi nyata. Segala apa yang terpancar dalam mimpi-mimpi gelap generasi terbuang, mulai memercikkan nyalanya dalam mimpi-mimpi ngeri kami pula. Tatkala “mati sekejap” itulah kami nampak sesuatu bergolek di atas tanah kontang dengan saki-baki banir yang mereput. Laku jalang orang-orang asing yang dilumatkan dengan laungan berulang-ulang: “Batang-batang balak terbaik kalianlah yang akan langsaikan hasrat kalian juga untuk lengkapkan sebuah ramalan.” Dilunakkan lagi dengan bahasa yang berselindung di belakang bahasa: “Untuk intai masa depan adalah untuk masukkan sebiji mata ke dalam segaris luka.” Bukannya kami tidak pernah membantah. Kalaupun kami berdiam, bukankah diam juga tindak untuk bersuara? Oh, kedengaran lagi ngiauan yang tidak dapat ditebak maksudnya... Biarlah kulit telanjang kami kelak digaringkan matahari, susuk lembik kami kelak dilencunkan keringat sendiri.

Senyap-senyap ingin kami selesaikan hari-hari tanpa mata generasi sebelum kami—hari-hari tanpa matahari. Langit hitam pun terbelah tatkala pagi buta terkulai kekejangan. Nikmat semakin hampir untuk menamatkan kedukaan, menamatkan kebutaan. Pada hari yang bermata, walau mata kami pedih ditikam cahaya, semakin jelas hamparan tanah gersang yang bukan lagi ditegakkan bangunan demi bangunan seperti setiap khabar yang dihembus ke telinga kami; bukan lagi ditegapkan binaan dengan tempat letak kereta bawah tanah berkadar percuma untuk sejam pertama; bukan lagi ruang terlaknat yang difikirkan selamat di mana generasi demi generasi yang tidak dipeduli jantan betinanya—sebelum berjantina—mati mengering dan menghamis; bukan lagi ruang bawah tanah yang sentiasa basah dan akan kekal menakung culas dan dosa-dosa pengurus kota, menggenang malapetaka daripada dendam yang dibalas alam; melainkan sebuah busur silang gergasi yang patuh menunggu apa-apa bisikan berbentuk arahan untuk lepaskan anak panahnya tepat ke segaris luka di langit. Segala-galanya daripada batang balak terbaik kami. Semata-mata. Kami melangut ke arah langit bermata satu yang galak mengintai. Beliau mata dia yang telah mencipta dan mencelikkan kami. Kerana menahan pedih sendiri, masing-masing pun membisu. Kami merenung dia menerusi segaris luka. Dan dia merenung kami sebelum sang arbalis kecil berupa makhluk berkaki empat berbulu hitam, dengan kudrat ekornya, menarik picu yang sedang meregang nasib kami pada sebatang anak panah. Dek hanya satu bisikan: lepaskan.

Cerpen, esei dan sajak boleh diikuti pada setiap minggu menerusi pautan selangorkini.my/category/renanca-bm/



SOKONG... Perdana Menteri Datuk Seri Anwar Ibrahim merasmikan Karnival Barang Malaysia 2023 di Putrajaya pada 14 Disember. Turut sama Menteri Perdagangan Dalam Negeri dan Kos Sarawak Hidup Datuk Armizan Mohd Ali (kiri), Timbalan Menteri Fuziah Salleh (dua, kanan) serta Ketua Setiausaha Datuk Seri Mohd Sayuthi Bakar. Foto BERNAMA

Potensi raih RM29.56 bilion

Jepun tambah nilai pelaburan

SHAH ALAM - Lawatan kerja Perdana Menteri Datuk Seri Anwar Ibrahim ke Jepun sempena sidang kemuncak peringatan Asean-Jepun meraih potensi pelaburan bernilai RM6.56 bilion.

Pertemuan dengan pelbagai pihak termasuk rakan sejawat Fumio Kishida menyaksikan anjakan hubungan Malaysia-Jepun dari segi kerjasama pelaburan, perdagangan, pendidikan dan teknologi.

"Lawatan ke Jepun berjaya dan membanggakan, berjaya menarik potensi pelaburan bernilai RM6.56 bilion," kata Anwar dalam sidang media di Tokyo

Tiada PKP walau kes Covid-19 naik

SHAH ALAM - Kerajaan tidak bercadang melaksanakan Perintah Kawalan Pergerakan (PKP) dalam masa terdekat meskipun penularan Covid-19 menunjukkan peningkatan kes kebelakangan ini.

Menteri Kesihatan Datuk Seri Dr Dzulkefly Ahmad berkata kementerian sebaliknya mengadakan lima strategi bawah Pelan Pengurusan Covid-19 untuk menangani pertambahan kes tersebut.

"Kita harap situasi ini dapat dilalui tanpa perlu mengulangi sekatan seperti PKP yang berlaku pada awal pan-

sebelum mengakhiri lawatan pada 18 Disember.

Katanya, ia tambahan kepada potensi pelaburan RM23 bilion semasa lawatan Malaysia ke Jepun pada Jun, sekali gus nilai kumulatif sepanjang tahun ini RM29.56 bilion, lapor Bernama.

Pelaburan tersebut melibatkan sektor tenaga boleh diperbaharu, elektrik dan elektronik, kimia dan ekonomi digital.

Tiga syarikat korporat Jepun Rohm Wako, NEC Co Ltd dan Mitsui & Co yang telahpun melabur di Malaysia juga cenderung menambah pelaburan mereka.

demik Covid-19," katanya pada sidang media di Putrajaya pada 18 Disember.

Katanya, lima strategi dibuat merangkumi pengesanan awal kes Covid-19 dan varian SARS-CoV-2 serta pemeriksaan komuniti melalui amalan TRIIS (periksa, lapor, asing, maklum, rawat).

Menjelaskan klinik kesihatan dan hospital sedia berdepan peningkatan kes, beliau berkata bekalan vaksin juga mencukupi bagi mereka yang mahu mendapatkannya termasuk dos penggalak.

Dr Dzulkefly menjelaskan sebanyak 20,696 kes baharu dilapor antara 10

Menurut Anwar yang juga menteri kewangan, potensi pelaburan tersebut berkemungkinan dalam bentuk pelaburan baharu ataupun mengembangkan pelaburan sedia ada.

Pada 16 Disember, beliau bertemu tiga syarikat korporat tersebut selain menghadiri sesi persidangan meja bulat dengan pelbagai peneraju industri di Negara Matahari Terbit itu.

Anwar berkata syarikat Jepun termasuk perusahaan kecil dan sederhana menunjukkan minat yang menggalakkan termasuk Rohm Wako yang ada pelaburan di Kota Bahru, Kelantan.

hingga 16 Disember, meningkat 62.2 peratus berbanding Minggu Epidemiologi sebelumnya.

Beliau berkata 20,677 kes tempatan atau 97.1 peratus melibatkan warganegara dan 609 kes tempatan (2.9 peratus) bukan warganegara manakala 19 kes import melibatkan 18 warganegara.

"Majoriti terdiri kategori satu (tiada gejala) dan dua (gejala ringan). Sebanyak 151 kes memerlukan rawatan di unit rawatan rapi.

"Sebanyak 96 kes pula memerlukan bantuan pernafasan selain 28 kes keematian direkod," katanya.

PM seru beli barang tempatan

SHAH ALAM - Perdana Menteri Datuk Seri Anwar Ibrahim mahu usaha mempromosi barang Malaysia pada peringkat antarabangsa dan tempatan diperingkat bagi merangsang pertumbuhan ekonomi.

Menasihati pengusaha tempatan mempertingkat mutu barang untuk bersaing dengan syarikat luar negara, beliau berkata pembelian barang tempatan menjana ekonomi negara, lapor Bernama.

"Kempen beli barang Malaysia juga harganya itu sederhana ketimbang (banding) harga import," katanya ketika merasmikan Karnival Barang Malaysia di Putrajaya pada 14 Disember.

Kempen tersebut diperkenal kerajaan untuk mengimbangi cabaran globalisasi semasa dalam merangsang pertumbuhan ekonomi domestik melalui peningkatan pembelian produk tempatan.

Tambah pencen penjawat awam

SHAH ALAM - Amaun pencen penjawat awam akan ditambah jika berlaku pengurangan berikutan keputusan mahkamah yang membatal pindaan Akta Pelarasan Pencen (Pindaan) 2013.

Perdana Menteri Datuk Seri Anwar Ibrahim memberi jaminan bayaran berkenaan tidak akan berkurangan daripada jumlah yang mereka terima pada masa ini, lapor Bernama.

"Kerajaan khususnya Perbadanan membuat keputusan untuk menokok jumlah yang dianggap kurang itu supaya tidak kurang daripada gaji (pencen) yang sepatutnya (diterima)," katanya.

Pada 27 Jun, Mahkamah Persekutuan membatal pindaan undang-undang pencen yang menjadikan pindaan Akta Pelarasan Pencen (Pindaan) 2013 tidak lagi terpakai kepada pesara kerajaan.

Pada Julai, kerajaan memutuskan pencen dan pencen terbitan bagi Julai 2023 hingga Disember 2023 dibayar mengikut amaun pencen asal.

Kutipan tabung bina hospital Palestin

SHAH ALAM - Kutipan Tabung Musa'adah Jabatan Kemajuan Islam Malaysia-Yayasan Wakaf Malaysia mencecah RM8.8 juta, kata Menteri Hal Ehwal Agama Datuk Dr Mohd Na'im Mokhtar.

Beliau menjelaskan dana berkenaan diagih secara berperingkat ke Palestin untuk membina kemudahan antaranya hospital dan pusat dapur, lapor Bernama.

"Kita akan kerjasama dengan beberapa badan bukan kerajaan untuk bina kemudahan yang kita rancangkan ini," katanya di Putrajaya pada 19 Disember.

Tabung tersebut yang dilancarkan pada Oktober 2020 berfungsi sebagai tabung bantuan kemanusiaan kepada golongan memerlukan tanpa mengira latar belakang.

Produk tempatan tidak kena cukai

SHAH ALAM - Cukai jualan 10 peratus bagi pembelian dalam talian mulai 1 Januari 2024 hanya terpakai untuk produk import bernilai RM500 ke bawah, kata Menteri Komunikasi Fahmi Fadzil.

Menjelaskan langkah tersebut bertujuan mempertingkat daya saing produk tempatan, beliau menjelaskan produk tempatan yang dibeli dalam talian tidak dikenakan cukai, lapor Bernama.

"Produk yang dihasilkan dalam negara tidak terkesan, jadi saya harap ini dapat kurangkan salah faham dalam kalangan masyarakat tentang cukai tersebut," katanya pada 17 Disember.

Sehari sebelumnya, Jabatan Kastam Diraja Malaysia memaklumkan Malaysia mula mengenakan cukai jualan ke atas barang bernilai rendah yang diimport dan dijual dalam talian mulai 1 Januari.

Kekurangan beras tempatan mereda

SHAH ALAM - Isu kekurangan bekalan beras putih tempatan kian mereda, dibantu hasil tuaian padi hujung tahun, kata Menteri Pertanian dan Keterjaminan Makanan Datuk Seri Mohamad Sabu.

Mengakui bekalan beras tempatan belum stabil sepenuhnya berikutan permintaan tinggi dalam kalangan pengguna, beliau berkata hasil tuaian itu dalam proses pengilangan, lapor Bernama.

"Beras kita hanya baru 65 peratus, jadi kita tidak cukup 35 peratus, beras tempatan menjadi rebutan sebab harga beras import mahal," katanya di ibu negara pada 18 Disember.

Mohamad Sabu juga menambah Lembaga Kemajuan Pertanian Muda (Mada) dalam proses penanaman semula padi untuk bekalan tahun hadapan.

Eksport bawang China, Pakistan

SHAH ALAM - Kerajaan akan mendapatkan bekalan bawang dari China dan Pakistan berikutan keputusan India melarang eksport sayuran tersebut hingga Mac tahun depan.

Menteri Pertanian dan Keterjaminan Makanan Datuk Seri Mohamad Sabu menjelaskan langkah tersebut tidak menyebabkan perubahan ketara kepada harga runcit bawang, lapor Bernama.

"Kita bersedia ke arah itu. Harganya (harga runcit) nanti Kementerian Perdagangan Dalam Negeri dan Kos Sarawak hidup akan bincang tetapi kesannya tidak banyak," katanya pada 16 Disember.

Pada 8 Disember, India yang menyumbang 36 peratus import bawang ke Malaysia melarang eksport bahan itu bagi meningkatkan bekalan domestik selain membendung inflasi di negara berkenaan.

Sekat kapal Israel berlabuh

SHAH ALAM - Kerajaan memutuskan untuk menyekat dan tidak membenarkan syarikat perkapalan berpangkalan di Israel, ZIM daripada berlabuh di mana-mana pelabuhan Malaysia.

Perdana Menteri Datuk Seri Anwar Ibrahim menegaskan Kementerian Pengangkutan akan bertindak segera dengan mengenakan larangan kekal terhadap syarikat itu berkuat kuasa serta-merta.

Jelasnya, sekatan itu tindak balas terhadap Israel yang mengeneppikan

prinsip asas kemanusiaan dan melanggar undang-undang antarabangsa menerusi pembantaian dan kekejam berterusan terhadap Palestin.

"Untuk rekod, Kabinet pada 2002 mula membenarkan kapal milik syarikat itu berlabuh di Malaysia. Pada 2005, Kabinet ketika itu memberi kebenaran kepada kapal tersebut untuk mendarat di Malaysia.

"Namun, kerajaan hari ini memutuskan untuk membatalkan semua keputusan Kabinet lalu. Kerajaan turut

memutuskan tidak lagi menerima kapal menggunakan bendera Israel untuk berlabuh di negara ini," katanya dalam kenyataan hari ini.

Perdana menteri menegaskan Malaysia turut melarang mana-mana kapal yang dalam perjalanan ke Israel daripada memuatkan kargo di pelabuhan Malaysia, juga berkuat kuasa serta-merta.

"Malaysia yakin keputusan tersebut tidak akan menjadikan kegiatan perdagangan Malaysia," kata Anwar.

2,506 klinik swasta sertai skim Madani

785,623 pesakit dirawat percuma

SHAH ALAM - Skim Perubatan Madani merekod lebih 1 juta kunjungan pesakit untuk menerima rawatan percuma di klinik swasta berdaftar sejak skim tersebut diperkenal pada 15 Jun.

Menteri kesihatan berkata 1,005,645 rawatan sedemikian diberi kepada 785,623 pesakit setakat 15 Disember meliputi 2,506 klinik swasta dengan kos keseluruhan RM62.5 juta, lapor Bernama.



Datuk Seri Dr Dzulkefly Ahmad menambah kerajaan menunjukkan kesungguhan apabila menyediakan peruntukan RM100 juta dalam Belanjawan 2024 supaya skim itu diteruskan pada tahun depan.

"Kementerian dan ProtectHealth komited memantapkan gerak kerja meningkatkan penglibatan klinik swasta di seluruh negara bagi memperluas akses kumpulan berpendapatan rendah (B40)," katanya.

Skim itu antara inisiatif kerajaan bagi menampung keperluan kesihatan golongan B40. Penerima Sumbangan Tunai Rahmah antara kelompok yang layak menerima rawatan tersebut secara automatik.

Menerusi usaha sedemikian, rawatan tanpa caj di klinik swasta berdaftar disediakan kepada B40 seterusnya menampung kos rawatan sakit ringan.

Semakan kelayakan dan carian klinik swasta boleh didapati melalui laman ProtectHealth www.protecthealth.com.my, aplikasi Skim Perubatan Madani dan MySejahtera.

Bantu 11,784 peneroka getah

SHAH ALAM - Peruntukan RM9.4 juta bagi Bantuan Musim Tengkujuh (BMT) disalur kepada 11,784 peneroka tanaman getah Lembaga Kemajuan Tanah Persekutuan (Felda) di seluruh negara.

Bantuan melalui Pihak Berkuasa Kemajuan Pekebun Kecil Perusahaan Getah (Risda) berjumlah RM800 setiap peneroka diberi dalam tiga fasa mulai

Disember 2023 sehingga Februari 2024.

"Bayaran fasa pertama melibatkan RM400 manakala fasa kedua dan ketiga masing-masing melibatkan RM200. Semua bayaran ini dibuat terus ke akaun bank peneroka," kata kenyataan.

Menurut Felda, peneroka yang menghantar hasil ke pusat mengumpul getah, tiada hasil kerana isu buruh atau

serangan penyakit dan dalam tempoh tanam semula bersama layak menerimanya.

Felda turut menghargai keprihatinan kerajaan yang memberi peruntukan yang sebelum ini ditanggung menggunakan dana dalam lembaga berkenaan sekali gus meringankan beban peneroka.

Kajian: Paras gula makanan tinggi

SHAH ALAM - Produk makanan berbungkus untuk kanak-kanak berusia antara enam bulan hingga tiga tahun di Asia Tenggara mengandungi paras gula dan garam yang tinggi, menurut satu kajian.

Label pada bungkus pula mengejirukan manakala komposisinya semakin longgar dan jualan produk sedemikian semakin berleluasa, lapor Bernama yang memetik agensi berita Xinhua.

Kajian berkenaan disokong Tabung Kanak-Kanak Pertubuhan Bangsa-Bangsa Bersatu (Unicef) dan rakan kongsi Consortium for Improving Complementary Foods in Southeast Asia (Commit).

Lebih 1,600 bijirin bayi, snek dan makanan yang dipasarkan kepada kanak-kanak di Kemboja, Indonesia, Laos, Malaysia, Filipina, Thailand dan Vietnam dinilai untuk kajian tersebut.

Sebanyak 44 peratus produk mengandungi gula tambahan dan pema-

nis, meningkat kepada 72 peratus untuk makanan ringan, manakala lebih sepertiga produk melebihi paras natrium yang disyorkan.

Kajian yang dikeluarkan pada 14 Disember itu juga mendapat tujuh negara itu tidak memiliki dasar komposisi dan pelabelan yang selaras panduan antarabangsa untuk produk sedemikian.

Beberapa negara pula tidak ada langkah undang-undang untuk mengawal kandungan gula dan garam.



KERJASAMA... Ketua Pegawai Eksekutif Perbadanan Kemajuan Negeri Selangor (PKNS) Dato' Mahmud Abbas (kiri) menyerahkan cek cura RM30,000 kepada Pemangku Datuk Bandar Shah Alam Cheremi Tarman bagi menjayakan program 'Shah Alam Trees For Life' di Shah Alam pada 13 Disember. Foto Facebook PKNS ► BERITA MUKA 23

Libat 189 premis

Tawar lesen operasi tadika, taska

SHAH ALAM - Sebanyak 189 premis yang menjalankan operasi tadika dan taska bawah pentadbiran Majlis Perbandaran Ampang Jaya (MPAJ) disarankan memohon lesen perniagaan sementara bersyarat.

Yang Dipertua Dr Ani Ahmad berkata tawaran menerusi program pemutihan itu juga meliputi pusat jagaan, pusat tafhib dan pusat kebajikan mengikut syarat ditetapkan pihak berkuasa tempatan.

Beliau menjelaskan syarat itu antara-

nya jauh dari persimpangan dan tidak mengganggu trafik pada waktu puncak selain beroperasi di lot penjuru bagi kemudahan di kawasan perumahan.

"Lesen sementara itu membolehkan premis yang menjalankan aktiviti tersebut beroperasi secara sah. Namun, dalam tempoh enam bulan pengusaha perlu kemuka dokumen tambahan," katanya.

Dr Ani berkata surat kebenaran merancang, kelulusan atau permit Jabatan Kebajikan Masyarakat dan Jabatan Pendidikan Selangor antara dokumen yang

diperlukan sebelum lesen penuh diberi.

Beliau dalam kenyataan pada 15 Disember menambah MPAJ mengadakan taklimat bersama pengusaha berhubung program pemutihan berkenaan pada 2 Disember.

"MPAJ mengalu-alukan pengusaha yang menerima surat tawaran lesen sementara bersyarat untuk menyertai program pemutihan ini," katanya.

Maklumat lanjut, hubungi Jabatan Perancang Bandar MPAJ di talian 03-42857008.

Lulus RM2.44 juta geran komuniti

SHAH ALAM - Sebanyak RM2.44 juta diperuntuk menerusi geran komuniti PJ Seed dalam tempoh lima tahun bagi menjayakan projek meningkatkan prestasi Majlis Bandaraya Petaling Jaya (MBPJ).

Menurut Sekretariat Media Unit Komunikasi Korporatnya, 138 permohonan yang diluluskan sejak 2019 bawah geran komuniti bawah Pelan Tindakan Petaling Jaya Pintar, Berdaya Tahan dan Berdaya Tahan 2030 (PJSSR 2030).

"Geran ini terbuka kepada semua

pemegang taruh seperti persatuan penduduk, sekolah, institusi pengajian tinggi dan badan bukan kerajaan sama ada di dalam atau luar Petaling Jaya.

"(Ia membolehkan pemegang taruh) kemuka projek atau idea yang dapat membantu meningkatkan prestasi MBSJ berdasarkan pelan PJSSR 2030," katanya dalam kenyataan pada 15 Disember.

MBPJ memaklumkan RM542,682.39 diperuntuk membabitkan 25 permohonan diluluskan tahun ini dengan 12

daripadanya projek kebun komuniti bawah tema bandar rendah karbon.

Kelulusan lain termasuk enam projek pendidikan dan pembelajaran, ekonomi kitaran (tiga), bandar berdaya tahan dan selamat (dua) dan bandar raya ekonomi serta masyarakat masing-masing satu.

"Semoga projek dapat dilaksanakan mengikut tempoh ditetapkan dan penduduk Petaling Jaya secara amnya menerima manfaat daripadanya," kata kenyataan itu.

RM2 bilion bangun bandar pintar

SHAH ALAM - Perbadanan Kemajuan Negeri Selangor (PKNS) akan membangunkan sebuah projek peremajaan bandar di sini bernilai kira-kira RM2 bilion pada suku ketiga tahun depan.

Ketua pegawai eksekutifnya menjelaskan projek itu di sekitar stesen Aliran Transit Ringan 3, Persiaran Dato' Menteri berciri pembangunan berorientasi transit dan berkonssep bandar pintar.

Dato' Mahmud Abbas berkata PKNS mahu membina kondominium disusuli membangunkan PKNS Square dan menambah baik beberapa bangunan sekitar Seksyen 14, Shah Alam termasuk Kompleks PKNS dan pusat beli-belah SACC.

"Projek ini mengambil masa agak panjang tetapi kita akan pastikan pada 2028, projek ini mencapai lebih 90 peratus siap," katanya pada 13 Disember.

Lupus barang lama sempena perayaan

SHAH ALAM - Majlis Bandaraya Petaling Jaya (MBPJ) mengadakan program pelupusan perabot, alatan elektrik serta pelbagai jenis barang lama secara percuma.

Sempena sambutan Krismas dan Tahun Baharu Cina, acara 'spring cleaning' dijalankan sehingga 24 Disember sebelum disambung semula pada 6 Januari hingga 3 Februari.

"Barang-barang hendaklah diletakkan di hadapan rumah sebelum jam 10 pagi. Kutipan ulangan tidak akan dibuat sekiranya lewat daripada masa tersebut," kata kenyataan pada 14 Disember.

Untuk pertanyaan lanjut, hubungi Jabatan Pengurusan Sisa Pepejal Dan Pembersihan Awam MBSJ di talian 03-7954 1440.

Butiran tarikh dan lokasi kutipan turut dikongsi di www.facebook.com/pjcity-council/posts/755042559984621

Pastikan tindakan telus, ikut prosedur

SUBANG JAYA - Majlis Bandaraya Subang Jaya (MBSJ) melancarkan manual prosedur penyempurnaan waran tangkap dan pelaksanaan kuasa tangkapan tanpa waran.

Datuk Bandarnya Dato' Mohd Fauzi Mohd Yatim berkata penerbitan manual itu membuktikan MBSJ mempunyai kaedah penguatkuasaan berkesan dan menyeluruh.

"Manual ini juga berfungsi sebagai garis panduan kepada semua pegawai dan kakitangan MBSJ dalam melaksanakan tindakan penangkapan dengan lebih berkesan, telus dan berintegriti."

"Ia juga selaras dengan Pelan Strategik MBSJ 2020-2025 iaitu teras enam untuk membentuk sebuah masyarakat yang madani," katanya dalam majlis pelancaran di ibu pejabat MBSJ pada 13 Disember.

Agih RM53,664 dana fidyah

SHAH ALAM - Majlis Agama Islam Selangor (Mais) mengagih peruntukan fidyah sebanyak RM53,664 kepada 312 penerima di daerah Petaling.

Agihan tersebut dijalankan 13 Disember dalam bentuk kotak makanan asas bernilai RM172 bagi setiap keluarga.

"Sumbangan fidyah Mais berupa set makanan kering seperti beras, minyak masak, mihun, gula, tepung gandum, kicap manis, sardin dan susu pekat manis," kata kenyataan.

Agihan tersebut melibatkan kerjasama rakan strategik agihan antaranya Persatuan Wanita Islam Prihatin (Pwip) Lembah Subang dan Sekolah Kebangsaan Subang Bestari.

"Terima kasih kepada semua pembayar fidyah, semoga sumbangan yang diberikan ini dapat membantu meringankan beban mereka," katanya.

Sumbangan bantu pusat tahliz terbakar

SHAH ALAM - Yayasan Islam Darul Ehsan (Yide) menghulur sumbangan segera kepada Maahad Tahliz Miftahul Ulum di Hulu Langat yang musnah akibat kebakaran pada 13 Disember.

Insiden berkenaan memusnahkan hampir 70 peratus blok asrama yang menempatkan 30 pelajar tahliz. Pasukan bomba masih menyiasat punca kebakaran.

"Sumbangan tunai kecemasan telah diserahkan oleh Pengurus Operasi Bahagian Kebajikan Yide Md Arifin Jaafar kepada wakil pengusaha pusat tahliz tersebut.

"Difahamkan juga, tiada pembukaan pusat penempatan sementara bagi mangsa yang terlibat," kata kenyataan.

Lanjut permohonan ke tingkatan satu

SHAH ALAM - Permohonan kemasukan pelajar tingkatan satu ke sekolah kendalian Jabatan Agama Islam Selangor (Jais) tahun hadapan dilanjutkan hingga 31 Disember.

Urusan itu membabitkan sekolah agama menengah (SAM), sekolah agama menengah tinggi (SAMT), sekolah menengah agama bestari (Sambest) dan maahad integrasi tahliz Selangor (Mits).

"Syarat kemasukan adalah ibu bapa terdiri warganegara Malaysia dan perlu menuju syarat kelayakan akademik."

"Selain itu, pemohon pernah bersekolah di sekolah rendah agama Islam (SRAI), sekolah rendah agama (SRA), kelas al-Quran dan fardhu ain integrasi (KAFAI), sekolah rendah Islam (SRI) serta sekolah rendah Islam integrasi (SRII)."

Sebelum ini, permohonan kemasukan dibuka dari 7 hingga 22 Disember melalui pautan esekolah.jais.gov.my

Serah RM50,000 wakaf fisabilillah

SHAH ALAM - Perbadanan Wakaf Selangor (PWS) menyalur sumbangan RM50,000 wakaf fisabilillah kepada Persatuan Kanser KanWork.

Timbalan Ketua Pegawai Eksekutifnya Anuar Hamzah Tohar berkata sumbangan itu untuk membantu pulih dan mengubah suai premis demi keselesaan penghuni rumah berkenaan.

"Sumbangan ini sebahagian inisiatif sumbangan fisabilillah PWS dalam mengoptimalkan penyaluran wakaf dengan

menyantuni institusi keagamaan, pendidikan dan kesihatan.

"PWS berterima kasih kepada pewakaf yang mewakafkan rumah itu melalui Perbadanan Wakaf Selangor dan Persatuan Kanser KanWork menerima manfaatnya," katanya menerusi kenyataan.

Beliau turut mempelawa orang ramai untuk melaksana wakaf tunai bersama PWS atau melayari Wakaf Selangor Online fpw.wakafselangor.gov.my/ewo_login.asp DuitNow QR

Pada 13 Disember, Duli Yang Maha Mulia Tengku Permaisuri Selangor Tengku Permaisuri Hajah Norashikin berkenan merasmikan pusat sokongan pesakit barah, Rumah KanWork di Damansara Utama.

Tengku Permaisuri Hajah Norashikin turut berkenan melancar buku Dari Dapur KanWork terbitan pusat tersebut, berkisar kepentingan aspek pemakanan sepanjang proses penyembuhan pesakit.

88.5 peratus pelajar lulus

Lebih 6,600 calon raih mumtaz

Oleh ZAREEF MUZAMMIL

SHAH ALAM - Seramai 6,689 daripada 43,127 pelajar Penilaian Sekolah Rendah Agama (PSRA) di Selangor memperoleh pangkat mumtaz atau cemerlang tahun ini.

Pengarah Jabatan Agama Islam Selangor (Jais) berkata 14,223 pelajar mendapat pangkat jayyid jiddan (sangat baik) manakala jayyid (baik) naik kepada 10,096 berbanding 9,743 tahun lalu.

Dato' Mohd Shahzihan Ahmad me-



maklumkan pelajar memperoleh pangkat maqbul (lulus) meningkat kepada 7,638 berbanding 6,839 tahun sebelumnya manakala musaadah (perlu bimbingan) seramai 4,950.

"Pencapaian peratus kelulusan keseluruhan PSRA tahun ini ialah 88.5 peratus berbanding 88.96 peratus pada 2022. Secara umumnya keputusan tahun ini terdapat sedikit penurunan."

"Pencapaian ini bukan terrendah dalam sejarah PSRA selama ia dilaksanakan, namun lebih penting kejayaan melahirkan murid berkete-

rampilan serta memiliki budi pekerti dan sahsiah," katanya.

Teks ucapan pengumuman keputusan PSRA 2023 pada 14 Disember itu dibaca Timbalan Pengarah Operasi Jais Salwana Ahmad Dahlani.

Mohd Shahzihan berkata peratusan lulus bagi mata pelajaran Akhlak dan Siraht mencatat 87.61 peratus, meningkat 1.04 peratus berbanding 2022 manakala bahasa Arab merekod 89.09 peratus lulus.

Beliau menambah Jawi, Imlak dan Khat pula mencatat 93.84 peratus lulus, Tauhid dan Fekah (87.61 peratus), Tajwid (83.78 peratus), Ujian Tilawah dan Hafazan (99.94 peratus).

Tambah baik lonjak calon lulus

SHAH ALAM - Jabatan Agama Islam Selangor (Jais) meneliti beberapa perkara bagi melonjakkan semula peratusan kelulusan peperiksaan Penilaian Sekolah Rendah Agama (PSRA) pada masa depan.

Ketua Penolong Pengarah Bahagian Pendidikan Islamnya Anas Ayob berkata aspek itu membabitkan latihan terhadap guru, penguasaan pelajar dan kurikulum sekali gus mengurangkan bilangan calon memperoleh pangkat

musaadah (perlu bimbingan).

"Musaadah bukan gagal tetapi perlu bimbingan untuk mata pelajaran tertentu. Mungkin mereka sangkul (kurang mahir) mata pelajaran Imlak yang berkait rapat dengan kemahiran penulisan."

"Kita kesan perkara ini (lemah Imlak) dari awal memandangkan kebanyakan pelajar ketika pandemik, masih tahun dua atau tiga. Jadi mereka kurang buat aktiviti dan latihan penulisan."

"Berdasarkan keputusan ini, kita akan

lihat kepada tiga aspek berkenaan bagi membantu meningkatkan penguasaan pelajar," katanya pada 14 Disember.

Seramai 6,689 pelajar memperoleh mumtaz atau cemerlang manakala 4,950 calon pangkat musaadah tahun ini dengan 88.5 peratus lulus keseluruhan.

Anas juga mengakui penurunan peratusan lulus turut didorong dampak pandemik pada 2020 yang membataskan pembelajaran murid secara fizikal sepanjang tempoh berkenaan.

Laksana pelan pengurusan trafik

SHAH ALAM - Majlis Bandaraya Shah Alam (MBSA) mengadakan dialog awam bagi mengumpul maklum balas pelan pengurusan lalu lintas sistematik bagi mewujudkan bandar raya bertaraf dunia.

Ketua Bahagian Korporat dan Perhubungan Awamnya berkata MBSA pihak berkuasa tempatan pertama membuat Pelan Induk Pengurusan Lalu Lintas Shah Alam meliputi kawasan seluas 30,310.72 hektar.

Menurut Mohd Azhar Mohd Sharif, cadangan pengurusan lalu lintas itu dibahagi kepada tiga tahun pelaksanaan iaitu jangka masa pendek (2025), sederhana (2030) dan panjang (2035).

Katanya, kajian itu untuk mengenal pasti keadaan semasa pengurusan trafik, kelulusan pelan pembangunan dan cadangan bagi menyelesaikan masalah lalu lintas dan sistem pengangkutan awam.

"Pelan induk berkenaan juga menyasar untuk memperkuuh sistem pengangkutan lalu lintas yang menyeluruh dan berkesan untuk menghubungkan pusat penempatan," katanya.

Mohd Azhar berkata ia meliputi usaha meningkatkan penggunaan kemudahan sedia ada mengikut keperluan pengguna termasuk aspek keselamatan, alam sekitar dan reka bentuk mudah ubah suai.



SEMANGAT... Pemain Selangor FC Muhammad Fazly Mazlan (kanan) diasak pemain PDRM FC Amir Saiful Badeli dalam perlawanan Liga Super di Stadium MBPJ, Petaling Jaya pada 17 Disember. Selangor FC menang 3-1. Foto Bernama

Wai Ching ungguli Larian Menara MBPJ

Peserta cilik tamat larian empat minit

Oleh **SOFIA NASIR**

PETALING JAYA - Seorang kanak-kanak bangun seawal jam 5 pagi untuk menyertai Pertandingan Kebangsaan Larian Menara Majlis Bandaraya Petaling Jaya (MBPJ) 2023 di sini, pada 17 Disember.

Shahid Al Zahran Mohd Saddam, 7, yang juga satu-satunya peserta cilik dalam acara tersebut menamatkan larian sebanyak 552 anak tangga itu dalam tempoh empat minit.

Menurut bapanya, Mohd Saddam Mohd Pittli, 32, anak sulung daripada tiga beradik itu meminati bidang su-

kan terutamanya larian seawal umur dua tahun.

"Saya latih dia sejak umur dua tahun. Saya tidak sangka dia minat dalam larian seperti saya. Cita-citanya juga mahu menjadi ahli sukan suatu hari nanti," katanya yang juga atlet negara dalam acara larian berhalangan.

Sementara itu, atlet nombor satu dunia larian tangga, Soh Wai Ching menepati ramalan apabila memenangi pertandingan berkenaan bagi kategori kebangsaan dan terbuka lelaki.

Atlet berusia 29 tahun itu menamatkan larian dalam masa 1 minit dan 57 saat sekali gus membawa pulang wang tunai RM2,000 dan plak.

"Cabarannya agak sukar kerana setiap peserta perlu mencatatkan masa terpantas dan ada tiga pusingan yang perlu dihabiskan, berbanding pertandingan lain yang hanya ada satu pusingan sahaja."

"Saingan juga agak kuat terutamanya dari peserta luar negara. Saya anak tempatan, dan saya perlu pastikan kemenangan ini milik negara kerana saya mahu harumkan nama Malaysia," katanya.

Seramai 350 peserta tempatan dan antarabangsa menyertai pertandingan yang julung kali diadakan dengan kerjasama Persatuan Larian Menara Malaysia.

Kampung Jawa-KDEB penentu juara

SHAH ALAM - Kampung Jawa Brothers dan KDEB FC mara ke perlawanan akhir Liga Super Gombak Piala Amirudin Shari 2023 selepas cemerlang di peringkat separuh akhir pada 16 dan 17 Disember.

KDEB FC terlebih dahulu mengesahkan kemaraan menewaskan Bloodbrothers FC menerusi penentuan separan penalti 4-2 selepas kedua-dua

pasukan terikat tanpa jaringan.

Separuh akhir kedua menyaksikan Kampung Jawa Brothers FC berjaya mengatasi cabaran sengit RPBC FC dengan kemenangan tipis 1-0 hasil jaringan R Agaantan pada babak kedua.

Sementara itu, Ketua Koordinator Liga Shahffuan Hazizi menjangkakan perlawanan akhir akan berlangsung meriah dengan kehadiran penyokong

kedua-dua pasukan.

"Selepas ini kita akan lakukan persiapan perlawanan akhir sebaiknya tambahan Dato' Menteri Besar akan hadir bersama pada sesi penyampaian hadiah," katanya.

Perlawanan akhir Liga Super Gombak Piala Amirudin Shari 2023 bakal berlangsung pada 13 Januari 2024 di Stadium Majlis Perbandaran Selayang.

Malaysia tuan rumah Mobile Legends

SHAH ALAM - Malaysia akan menjadi tumpuan penggemar e-sukan sejagat tahun depan selepas dipilih menjadi tuan rumah Kejohanan Dunia Mobile Legends: Bang Bang (MLBB) M6.

Timbalan Menteri Belia dan Sukan Adam Adli Abd Halim berkata ia menjadi satu daripada acara penting negara dan mengalu-alukan kehadiran semua peminat e-sukan dunia, lapor Bernama.

"Saya teruja untuk mengumumkan Malaysia akan menjadi tuan rumah untuk Kejohanan Dunia Mobile Legends: Bang Bang (MLBB) M6 pada 2024. Ini merupakan kali kedua Malaysia menjadi tuan rumah untuk kejohanan ini, susulan kejayaan menjadi tuan rumah M1 pada 2019."

"M6 akan menjadi peristiwa diingati di dalam negara dan kami mengalu-alukan pemain, peminat dan penggemar e-sukan dari seluruh dunia untuk mengalami layanan baik tiada tandingan yang diberikan rakyat Malaysia," katanya.

Tarik penyertaan peserta luar negara

PETALING JAYA - Seramai 350 peserta tempatan dan antarabangsa menyertai Pertandingan Kebangsaan Larian Menara Majlis Bandaraya Petaling Jaya (MBPJ) 2023.

Timbalan Setiausaha (Pembangunan) MBPJ Ir Ismail Shafie berkata pertandingan itu semakin mendapat tempat di negara ini khususnya dalam kalangan individu yang mementingkan gaya hidup sihat.

"Sebelum ini, kesedaran untuk bidang sukan ini agak kurang dan ada yang tidak berani mencuba larian tangga kerana mereka tidak memahami teknik yang betul.

"Program ini memberi kesempatan kepada MBPJ untuk mempromosikannya selain kami turut menganjurkan bengkel larian tangga di Menara MBPJ setiap Sabtu petang," katanya pada 17 Disember.

Persiap pasukan ke piala dunia hoki

SHAH ALAM - Skuad hoki 5 sebelah (5's) lelaki kebangsaan enggan memandang rendah kemampuan lawan dalam Piala Dunia 5's yang berlangsung dari 28 hingga 31 Januari depan di Muscat, Oman.

Pengurus pasukan Mohamad Sukri Abdul Mutalib berkata sukar untuk menentukan kemampuan lawan memandangkan kejohanan ini kali pertama dianjurkan, lapor Berita Harian.

"Kita belum meletak apa-apa sasaran, hanya memberi tumpuan daripada satu perlawanan ke satu perlawanan. Kita tidak mahu beri tekanan kepada pemain. Apa yang mustahak sekarang ini adalah mempersiapkan pasukan sebaik mungkin," katanya pada 17 Disember.



DATUK RIZAM ISMAIL Sungai Air Tawar

lancar program pendidikan di Sekolah Menengah Kebangsaan Ungku Aziz, Sabak Bernam



AZMIZAM ZAMAN HURI Pelabuhan Klang

menyertai sukaneka bersama penduduk Taman Saujana di Klang



LIM YI WEI Kampung Tunku

memeriahkan kejohanan ragbi wanita di Padang Astaka, Petaling Jaya



MARIAM ABDUL RASHID Meru

meninjau turapan parkir Surau Jamiatun Nikmah di Kampung Bukit Cerakah Jaya, Klang



CHUA WEI KIAT Rawang

menyampaikan pingat pertandingan badminton di dewan sukan Rawang, Hulu Selangor



ONG CHUN WEI Balakong

menyumbang barang keperluan kepada penduduk di kawasan DUN beliau



MUHAMMAD IZUAN KASIM Kota Damansara

memberikan bengkung silat gayong di Sekolah Kebangsaan U3, Petaling Jaya



SYED AHMAD ALHADAD Lembah Jaya

merasmikan program khatan perdana di Masjid Taman Kosas, Ampang Jaya

Naik taraf perparitan siap Januari

SHAH ALAM - Kerja naik taraf sistem saliran bernilai RM6.8 juta di Taman Sri Muda di sini mencapai kemajuan 87 peratus dan dijangka siap sepenuhnya pada akhir Januari.

Wakil rakyat Kota Kemuning S Preakas berkata projek yang dijalankan Jabatan Pengairan dan Saliran sejak awal Julai 2021 itu bertujuan mengatasi masalah banjir di kawasan tersebut.

"Tempoh pelaksanaan asal projek



ini selama 24 bulan mulai 1 Julai 2021 hingga 1 Julai 2023. Bagaimanapun, projek ini mendapat lanjutan masa sehingga 24 Januari atas beberapa kekangan.

"Ini termasuk arahan perintah kawalan pergerakan diperketat selain banjir besar pada Disember 2021 yang menyebabkan kerosakan tapak bina serta kelewatan kelulusan permohonan bekalan kuasa 'compact sub' Tenaga Nasional Berhad," katanya.

Preakas menambah tumpuan utama kerja menaik taraf melibatkan perlindungan tebing, pemasangan pam skrew, pembinaan kuarters serta 'compact sub' dan komponen elektrikal.

Katanya, beberapa projek bagi menangani isu sama turut dibuat Majlis Bandaraya Shah Alam antaranya membina rumah pam di Persiaran Aman, Jalan Saksama 25/39 dan Jalan Khidmat 25/35.

"Kerja lain dalam fasa pelaksanaan ia-lah naik taraf longkang pembentung dan parit erong antaranya di Jalan Gemilang 25/1 dan Jalan Abadi 25/58," katanya.

70 peserta sertai klinik sukan

Cungkil bakat baharu bola sepak

Oleh SHEEDA FATHIL

SUBANG JAYA - Pengurusan Dewan Undangan Negeri (DUN) Kinrara menuahkan klinik bola sepak bagi mencungkil bakat kanak-kanak berusia lingkungan lima hingga 17 tahun dalam sukan itu.

Ahli Dewan Negerinya Ng Sze Han menjelaskan klinik itu yang diadakan Oktober tahun lalu kini disertai 70 peserta pelbagai peringkat usia yang juga pen-

duduk sekitar DUN tersebut.

"Sambutan menggalakkan selepas setahun klinik ini ditubuh, ramai ibu bapa menghantar anak menyertai klinik ini bagi mengasah bakat."

"Dengan inisiatif ini, ia membantu dan menggalakkan lagi minat anak cilik terhadap sukan bola sepak selain menjadikan mereka lebih berdisiplin," katanya.

Ketua Jurulatih Ewan Mahfuzh pula berkata pengambilan muka baharu akan dibuat pada tahun depan berikutkan

pendaftaran ditutup selepas penyertaan menjangkau 70 orang.

Beliau berharap bakat pemain cilik itu dipandang pemerhati sukan terutama Team Selangor dan Selangor FA supaya mereka boleh pergi ke peringkat lebih tinggi.

Peserta mendapat latihan jurulatih bertaualiah daripada Persatuan Bola Sepak Selangor. Latihan diadakan pada setiap Ahad antara 8.30 hingga 10.30 pagi di Padang BK2, Kinrara.

Capai status bandar tahun depan

SHAH ALAM - Taman Sentosa, Klang yang dihuni lebih 30,000 penduduk dijangka mencapai status bandar menjelang pertengahan tahun depan, kata wakil rakyat Sentosa Dr G Gunaraj.

Beliau berkata perbincangan bersama Majlis Perbandaran Klang (MPK) giat berjalan termasuk merangka garis panduan pembangunan kemudahan antaranya pusat komersial, bank dan hospital.

"Mungkin selepas pengisytiharan

MPK sebagai bandar raya (status Taman Sentosa bertukar kepada bandar) memandangkan pihak berkuasa tempatan (PBT) sedang membuat persiapan ke arah itu.

"Jika PBT bawa perkara ini dalam agenda mereka termasuk mendapat ulasan semua jabatan, dalam enam bulan boleh selesai (status naik taraf bandar)," katanya pada 12 Disember.

Taman Sentosa antara kawasan bawah Dewan Undangan Negeri Sentosa yang mempunyai penduduk pa-

ling ramai berbanding Bandar Botanic, Bandar Bukit Tinggi, Bandar Putera dan Bandar Puteri.

Beliau percaya minda dan pemikiran masyarakat bakal berubah sebaik Taman Sentosa yang mempunyai 25 taman perumahan mencapai status tersebut.

Gunaraj turut menjangka berlaku lonjakan harga rumah di kawasan berkenaan selain rakyat menikmati prasarana lebih selesa termasuk tiada lagi isu banjir.

Usaha sama pelihara alam sekitar

SHAH ALAM - Perbadanan Kemajuan Negeri Selangor (PKNS) menyumbangkan RM30,000 kepada Majlis Bandaraya Shah Alam (MBSA) bagi menjayakan program 'Shah Alam Trees For Life'.

Ketua Pegawai Eksekutifnya Dato' Mahmud Abbas berkata dana tersebut untuk menanam 2,500 pokok pelbagai spesies antaranya jasmin, kelat paya dan bonsai di sekitar Taman Tasik Shah Alam.

"Ini merupakan program 'Shah Alam Trees For Life' kedua melibatkan kerjasama antara PKNS dan MBSA sekali gus membuktikan komitmen erat kedua-dua pihak dalam menjaga alam sekitar."

"Inisiatif ini antara tanggungjawab sosial korporat dalam menyokong agenda menggalakkan pemuliharaan alam semula jadi seiring PKNS sebagai organisasi memperjuang kemampa-

nan," katanya.

Beliau menghadiri program berkenaan yang disempurnakan Pemangku Datuk Bandar Shah Alam Cheremi Tarman di Taman Tasik Shah Alam di sini pada 13 Disember.

Mahmud juga menjelaskan sumbangan sama akan diperluas kepada beberapa pihak berkuasa tempatan (PBT) pada masa depan demi melestarikan alam sekitar.

Tawar sukarelawan, guaman percuma

SHAH ALAM - Pusat Khidmat Masyarakat Taman Templer memperkenal inisiatif kepada penduduk setempat iaitu khidmat sukarelawan dan nasihat guaman percuma.

Wakil rakyatnya Anfaal Saari berkata perkhidmatan menerusi Sukarelawan Kesukarelawanan, Inovatif, Tindakan dan Amanah itu menjadi penghubung untuk membantu masyarakat di situ.

Orang ramai yang mahu mendapat khidmat nasihat, mengetahui lebih lanjut inisiatif kerajaan atau memerlukan bantuan diminta menghubungi pasukan pusat khidmat itu.

"Insya-Allah, pintu pusat khidmat masyarakat akan sentiasa terbuka kepada rakyat Taman Templer sebagai penghubung untuk menyelesaikan masalah setempat," katanya yang juga EXCO negeri.

Sedia perluas zon kitar semula

SHAH ALAM - Program kitar semula sisir dari kawasan rumah teres sekitar Subang Jaya bermula awal bulan ini membabitkan zon satu dan dua, maklum KDEB Waste Management.

Menurut pengarah urusannya, inisiatif dengan kerjasama pejabat Dewan Undangan Negeri Subang Jaya menumpukan kawasan SS12 hingga SS19, Wangsa Baiduri, PJS 7,9 serta 11.

Dato' Ramli Mohd Tahir menjelaskan bahan yang boleh dikitar semula hanya aluminium, plastik dan kertas kering dengan penduduk perlu mengasingkannya dalam beg yang ditetapkan.

"Sisa perabot, alat elektronik, permainan, bungkus makanan, pakaian dan perkakas pembinaan tidak dibenarkan. Kutipan dibuat tiga kali seminggu," katanya yang sedia memperluas program itu ke zon lain.

Tanam pokok pelbagai spesies


SHAH ALAM - Sebanyak 177,899 pokok pelbagai spesies ditanam Majlis Bandaraya Shah Alam (MBSA) dalam program 'Shah Alam Trees For Life' sejak 2010.

Pemangku Datuk Bandar Cheremi Tarman menjelaskan inisiatif berkenaan seiring agenda untuk menjadikan Shah Alam sebagai bandar raya rendah karbon menjelang tahun 2030.

Katanya, 68 program penanaman pokok dibuat melibatkan 22,000 sukarelawan pelbagai institusi pengajian tinggi, badan bukan kerajaan, agensi kerajaan dan syarikat korporat dan swasta.

Selain penanaman pokok, MBSA turut mengadakan program berkaitan antaranya Shah Alam Hari Tanpa Kenderaan, Perintis Hijau, Dusun@My Sekolah dan penyediaan trek basikal.

selangorkini



Cerpen, puisi & esei
**HADIAH SASTERA
SELANGOR
2023**

terbit setiap Sabtu dan Ahad
di portal selangorkini.my

Program selawat ambang tahun baharu

SHAH ALAM - Kemuncak sambutan ambang tahun baharu 2024 bakal dimeriahkan dengan program Darul Ehsan Berselawat di Dataran Karnival, perkarangan Stadium Shah Alam pada 31 Disember.

Pengarah program Daing Muhammad Reduan berkata sambutan berkonsep keagamaan turut diserikan dengan program Doa Untuk Palestin yang turut menampilkan beberapa artis ternama sehari sebelumnya.

"Untuk sambutan tahun ini kita tampilkan beberapa tokoh antaranya Habib Jindan Novel, Habib Ali Zainal Abiin Assegaf dan Habib Nael Ben Taher. Program bermula 7 malam.

"Kita juga bekerjasama dengan Ribath Fatimah Az-Zahra dan Majlis Perundingan Pertubuhan Islam Malaysia (Mapim) untuk program Doa Untuk Palestin. Selain itu, ada juga pameran mengenai Palestin dan persembahan artis," katanya.

Pengunjung turut diingatkan untuk membawa sejada dan tikar serta memakai pelitup muka.

Kunjungi muzium sempena cuti sekolah

SHAH ALAM - Semua muzium seliaan Perbadanan Adat Melayu dan Warisan Negeri Selangor (PADAT) dibuka setiap hari sepanjang cuti persekolahan.

Agensi itu menerusi Facebook memaklumkan, waktu operasi seawal jam 9.30 pagi hingga 5.30 petang sehingga 1 Januari 2024.

Enam muzium bawah seliaan PADAT adalah Muzium Sultan Alam Shah di Shah Alam, Muzium Insitu (Kuala Langat) dan Muzium Sabak Bernam.

Selain itu, Istana Bandar di Kuala Langat serta Muzium Sejarah Kuala Selangor dan Muzium Permainan Tradisional (Kuala Selangor).

PADAT merupakan organisasi yang memberi tumpuan kepada pameran, penyelidikan, penerbitan dan pengumpulan koleksi sejak 1975.

pancawarna

Rundingan damai bebaskan al-Quds

Khalifah Umar al-Khattab beri contoh terbaik toleransi Islam



Pohon kedamaian dan simbol kehidupan

Tradisi pokok Krismas bermula sejak abad kelapan di Jerman



Ikatan keluarga utuh meski beza agama

Marsha Milan masih beli hadiah untuk keluarga sambut Hari Natal



JUARA... Atlet larian tangga nombor satu dunia Soh Wai Ching memenangi Pertandingan Kebangsaan Larian Menara MBPJ 2023 di Petaling Jaya pada 17 Disember. Foto REMY ARIFIN ► BERITA MUKA 21

Ayuh meriahkan Pesta Rentak Selangor Imbau kenangan legenda 70-an

Oleh SUHAILA SHAHRUL ANNUAR

SHAH ALAM - Pesta Rentak Selangor bakal mengimbau nostalgia lagu-lagu 70-an dengan penampilan istimewa penyanyi veteran Datuk Hail Amir dan A Razak Ismail.

EXCO kebudayaan berkata program dua hari bermula 22 Disember menyajikan pelbagai aktiviti menarik termasuk persembahan kebudayaan,

pertandingan dan jualan dari 10 pagi hingga 10 malam di Dewan Sivik Majlis Bandaraya Petaling Jaya (MBPJ).

Menurut Borhan Aman Shah, pengunjung berpeluang memenangi hadiah keseluruhan RM2,500 menerusi pertandingan kostum 70-an terbaik.

"Konsert berkenaan merangkumi empat segmen iaitu instrumental, bakat baharu, kugiran dan penampilan istimewa artis 70-an seperti Hail Amir, A Razak Ismail, Junainah M Amin,

Datin Effa Rizan dan J Mizan.

"Pemilihan pemenang kostum 70-an terbaik akan dibuat menerusi tangkap layar sepanjang program berlangsung pada Sabtu. Pakaian terbaik lelaki dan wanita masing-masing bakal menerima RM1,000 dan RM500 (kanak-kanak 12 tahun ke bawah)," katanya.

Dengan tema pakaian retro 70-an Borhan berkata kemuncak pesta itu adalah Konsert Rentak Selangor: Nostalgia Lagu 70-an mulai 8 malam.